

ممتوع الضحك

حنان لاشين
(أم البنين)

دار البش
للطباعة والنشر



ممنوع الضحك

هذا الكتاب

مقالات ساخرة خفيفة متنوعة ومنفصلة تتحدث بشكل عام عن بعض السلوكيات والأخطاء التي نقع فيها جميعاً بينما نختلط بالآخرين، تحاول الكاتبة بطريقة بسيطة عرض بعض الحوارات الزوجية لتظهر الخطأ الذي يقع فيه أحد الزوجين بشكل فكاهي فتأتي النصيحة بطريقة غير مباشرة مع رسم البسمه على وجه القاري..



دار البشير للثقافة

01012355714 - 01152806533

darelbasheerealla@gmail.com

darelbasheer@hotmail.com

www.darelbasheer.com



ممنوع الضحك



اسم الكتاب: ممنوع الضحك

الـتـأـليف: حنان لاشين

عدد الصفحات: 240 صفحة

عدد الملازم: 15 ملزمة

مقاس الكتاب: 14 × 20 سم

عدد الطبعات: الطبعة الأولى

الإيداع القانوني: 2015/15049

الترقيم الدولي: I.S.B.N.978/977/278/488 /2

جميع الحقوق محفوظة

يمنع طبع هذا الكتاب أو جزء منه بكل
طرق الطبع ، والتصوير ، والنقل ،
والترجمة ، والتسجيل المرئي والمسموع
والحاسوبي ، وغيرها من الحقوق إلا بإذن
خطي من :

1435 هـ

2015 م

التوزيع والنشر
دار البشير للنشأة والمؤثر
مصر

darelbasheer@hotmail.com

darelbasheeralla@gmail.com

ت : 01152806533 - 01012355714

ممنوع الضحك

د. حنان لاشين
(أم البنين)

دار البشير
للثقافة والمؤثر

■ ■ ممنوع الضحك ■ ■

بِسْمِ اللَّهِ الرَّحْمَنِ الرَّحِيمِ

إهداء

إلى البسطاء، أصحاب القلوب البيضاء.

مقدمة

جرب أن تراقب طفلاً يضحك وستضحك.

جرب أن تراقب نفسك وأنت تأكل وستضحك.

جرب أن تراقب تثاؤب رضيع وستضحك.

نضحك أحياناً على أنفسنا، ونضحك أحياناً دون قصد على أخطاء الآخرين، ويضحكننا الصغار ببراءتهم، والبعض ينتزع منا الضحك بتلقائية وفن، وقد نصاب أحياناً بعدوى الضحك.

عندما نضحك فجأة، نحن نفتح أبواب السعادة لتتنفس أرواحنا. سنصف مواقفنا نعيشها في حياتنا اليومية في كل البيوت، وبعض الحوارات الزوجية، والكثير من السلوكيات الخاطئة التي لا ننتبه لها أحياناً في المسجد، وأحياناً ونحن نزور الآخرين، وقد نتحدث عن

■ ■ ممنوع الضحك ■ ■

اختيارك لنصفك الآخر.

ولكن... عندما نتحدث عن "حصاد الغربة"، وآلام الوطن في صباح
مشرق، حتمًا سيكون الضحك ممنوعًا للحظات ولكنها لن تطول!
من فضلك، اضحك معنا فأسنانك ليست عورة.
ولا تصدق أبدًا أن... "ممنوع الضحك"

* * *

1

إزاي تبسط مراتك

1 - "ابتسم وأنت تفتح باب البيت فشكلك أجمل وأنت مبتسم"
(اعمل نفسك متفاجئ بالولاد وحاول تكون مبهج، هي أصلاً كانت
هاتعجنهم وأنت لحقتهم)

2 - "قول لها رمستيني إيه الشياكة دي"
(ما تدققش لو لسه لابسه نفس الفستان بتاع أول إمبراح.. قول
وخلص وهي هاتفهم وتلبس واحد جديد)

3 - "استرها وما تقولش لحد على غلطاتها".
لو في يوم حرقت صينية البطاطس خليك ستر وغطى عليها
وافتكرك لها طاجن البامية اللذيذ بتاع السنة اللي فاتت وسامحها ما
كلنا حرقنا البطاطس.

4 - "ساعدنا في شغل البيت"

لو لقيت تراب على السفرة هات فوطة ولمع علشان تكسفها.. أأ..

قصدي

أو ارسم عليه قلب وسهم وحرف اسمك واسمها وسيب التراب
وهي بعد كده هاتأخذ بالها.

5 - "أديها مهر وف تيجب بيه اللي نفسها فيه وخصوها لو

مش بتستغل.. بيوفر قوي"

(حتى لو جابت بيه جيلي كولا ما تناقشهاش)

6 - "أكتب لها جواب ولو مرة كل شهر"

(حسن خطك وحطه في المطبخ علشان تتأكد إنها هاتشوفه

أول ما تصحى من النوم..

أصلها بتقوم فوراً من السرير على المطبخ علشان تأكل أأ.. قصدي

تطبخ)

7 - "طب طب عليها زي الأب ما يبطط على بنته... الست

رقيقة بتحتاج كده"

■ ممنوع الضحك ■

(بس مش وهي بتصرخ للعيال.. مش وقته.. طبطب عليها بعد
ما تقدم لك صينية الكنافة وتخلص شغل البيت وتقعّد ترتاح.. ساعتها
بتبقى مهدودة فعلاً)

8 - "أسكر فيها قدام أهللك"

(ما تجيبش سيرة التراب اللي على السفرة)

وفي أخلاقها وطبيخها

(انسى صينية البطاطس)

وصبرها على العيال

(حاول تنسى صوت صريخها وهي بتغير لابنك)

وشياكتها

(بغض النظر عن العباية البرتقاني أم كسر)

9 - "ما تقارنناش بعد علشان هي ما تقارنكش بعد"

مش لازم تحكي عن زميلتك في الشغل الباشمهندسة فوزية

والدكتورة حسنية

■ ممنوع الضحك ■

وتشكر في شخصيتها وترغي وهي قاعدة في البيت منقطعة عن
العالم

وضحت بطموحها الدراسي وطالع عينها وفي الآخر تشكر في
عنايات وهي قاعدة
غيب ما يصحش.

10 - "أمكبي لها عن يومك حاجات يمكن بالنسبة لك بسيطة

بس هي لما بتعرفها وتلاقيك بتحكي بتحسها بالأمان"
الستات بتحب الأخبار (فراغ) سيبها تعيش دور المحقق كونان
وجاوب على أسئلتها

11 - "فخرجها مرة كل أسبوع"

الحبسة في البيت بتخفق.. أو اسمح لها تزور صاحباتها

12 - "اشكرني أهلها حتى لو مش بتحبهم.. دور فيهم على

أي حاجة حلوة"

13 - "هاتلها ورد"

■ ممنوع الضحك ■

بلاش دباديب دول للمخطوبين بس.. وهاتلها شوكولاتة.. حلوة الماندولين"

14 - "افتكر أيام الخطوبة"

15 - "لما تتعب وتسخن ارقبها وادعي لها واعمل لها ينسون واظهر شوية تعاطف" (حاول تخبي فرحتك)

16 - "لو خاربين واشتريتوا حاجة ما تسيلهاش كل الألباس كفاية عليها كيس"

بالله عليك.. هي أسيرة عندك وكانت فرحانة بيك وعشمها فيك كبير، فما تخيبش ظنها وحطها في عينك واتق الله.



2

أفكار رومانسية

عزيزتي حواء ركزي معايه

عيشي مع زوجك لحظة حلوة..

بس ما تقفیش علی سور البلكونة وتقوليله تعالى نعمل زي

تايتانيك، هايتركك ويقول انتحرت

مافيش تايتانيك وأصلا الفيلم متصور في طشت.

(بس ممكن تتفرجي معاه على صور خطوبتكم)

ابعتي له جوابات حب وعطريها بالبارفيوم اللي بيعبه

بس ما تكتبيش على ورق (بحبك) وتطبقيهم مربعات

وتحطيهاله في الرز.. علشان وهو بياكل يلاقيها يروح مطالعها

ويقراها ويفرح

■ ممنوع الضحك ■

هيلعها وتقف في زوره وأنت حرة

(اكتبيها في جواب وحطيتها على السفرة جنب الطبق)

♥ ربي أمورك ونظمي وقتك واغرمي معاه

بس بلاش تقويله لما تروحوا مطعم اسحب لي الكرسي وقعدني

الأول لأنه منتظر الفرصة دي من زمان هيقعك علشان يبقى بيهزر

معاكي ومش حارمك من حاجة

(اقعدي قدامه علشان مايشوفش غيرك ونفسه تتسد.. أاا. قصدي

علشان يشوف نفسه في عيونك وابتسمي)

♥ لما يدخل من الباب مسيه إنك فرمانه بدخلته.

بس بلاش تعيشي الدور وتلبسي الجيبة أم كرانش وتتنططي

وتغني أهلاً أهلاً بالعيد لما يرجع من الشغل.. هيتصدم ويقفل الباب

تاني وهيتغدى لوحده في كنتاكي.

(البسي فستان شيك وسرحي شعرك بطريقة حلوة)

♥ مسيه إنه غالي عليك

بس بلاش ثقلبيها دراما وتقويله وأنت بتعيطي أنا بحبك ومش
عارفة لو جرى لك حاجة هاعمل إيه من غيرك أنا والعيال.. يا نكدية
(اضربي واحده سنيكرز.. إنتِ مش إنتِ وإنِ جعانة).

♥ مطيح فانة فيها ورد على السفرة

بس بلاش تقطعي الورد وتعمليله طريق من باب الشقة لحد
الطبلية.. أأا.. قصدي السفرة، ابنك اللي بيزحف هيفتكه حاجه تتاكل
وهياكله وهيجيله إسهاال

وَأنتِ اللي هتسهرى بيه.. بلاش الورد

(خدي بإيده وامشي معاه لحد السفرة).

♥ الإضاءة الرومانسية

بس بلاش العشاء على أضواء الشموع مهما عملتي مش هتداري
غلطتك هيعرف إن الفرخة لزقت في الطاسة وأنت بتحمريها واتهرت..
أكله في النور.

(الأباجورة.. إضاءة رومانسية).

❖ اعمليله مفاجأة تبهره

بس بلاش تفاجئيه وتروحيه الشغل..

لو دكتور.. هيقول دي مريضة عندي

لو محامي.. هيقول زبونة ولها قضية

لو مدرس.. هيقول والدة تلميذ فاشل عندي على ابنك

لو مهندس.. هيقول لقيتها في الموقع تحت العمارة اللي اتهدت

لو ضابط.. هيقول دي مجرمة أنا قبضت عليها وهيوديكي السجن

(خليكي في البيت أحسن).

❖ بالارش تستخبي ورا الستارة علشان يقلق ويدور

عليك..

أولا: هيتسرع

ثانيا: مش هيدور عليك أصلا وهتفضلي ورا الستارة.. بلاش

■ ■ ممنوع الضحك ■ ■

♥ إديله أكبر مة في الفرقة

أكله قبل ما تاكلي

غطيه لما ينام وطبطبي عليه

خليكي حنية

ووطي صوتك

وبلاش الشبشب أبو كعب في البيت.



3

احترس من المرأة

عندما تراقب زوجتك، ستلاحظ أنها تكرر بعض العبارات، فلا تهملها... واحترس فأنت في خطر..

ⓧ كنت فين؟

جملة خاطفة تخرجها الزوجة بمهارة وهي تجلس بهدوء مصطنع على كنبه الأنتريه، بعد تأخر الزوج وتأكيدها أنه كان يضحك وهو واقف مع زميله في الشارع ساعة ونص وهي قلقانة.
(ننصح بالاتجاه فوراً لأحد الغرف مع اصطحاب الأطفال وغلق الباب حتى تهدأ).

ⓧ يا بحتك

جملة حقودة موجهة للزوج وهو يستعد للخروج مع رفاقه لمشاهدة الماتش في النادي..

■ ممنوع الضحك ■

ⓧ الصمت

الصمت شيء مقلق ويسبق العاصفة وتصاحبه آثار سلبية تظهر
بوضوح على الأبناء
(محتاجين يستحموا)
والمطبخ
(المواعين ماتغسلتش)
ننصح في هذه الحالة بالمسح على رأسها بحرص، والطبخة على
كتفها بحنان
والسماح لها بالبكاء.

(خلاص هي ضربت وكان لازم تفصل علشان تقدر تكمل)

ⓧ عاونرة ورد يا إبراهيم

جملة تكررهما المرأة عندما تفتقد الرومانسية
(هي مش مجنونة ولا نسييت اسمك هي شافت الفيلم بتاع هند صبري..
لازم تجيب ورد حتى لو اسمك مش إبراهيم).

■ ممنوع الضحك ■

ⓧ ربطة النينجا

هي ربطة للرأس تجيد الزوجة لفها بمهارة على رأسها مع عقدها من الأمام على شكل فيونكة ونلاحظ كبسها على الجبين فتظهر العينان بشكل ضيق، لكنه يسمح بالرؤية.

(ننصح بتكرار كلمة سلامتك يا حبيبتى كل دقيقتين مع التأكيد على تناول حبايتين بانادول ومج نسكافية وشوكولاتة جالاكسي، والصبر لحد ما الصداع يروح).



4

عبارات تسمعونها من زوجك

🍏 «جعات»

نداء عاطفي يطلقه الزوج فور دخوله البيت ويلاحظ تشوش في الرؤية وظهور علامات الإرهاق والتأثر.

(ننصح بسرعة الغرف والقلبي والتحمير حرصًا على سلامة الزوجة ونبشركم بعدم انتباهه لغياب الملح في الأكل لأنه جعان)
وما تقوليلوش ساعتها إيه رأيك في تسريحة شعري.

🍏 «أنا رايح أنام»

جملة تحذيرية قد تظهر بصيغة إخبارية (بس هي مش كده خالص)
يلاحظ فيها رفع وتقوس الحاجب الأيسر وإشهار إصبع السبابة أمام وجهه

■ ■ ممنوع الضحك ■ ■

على طول، واللي تشد لك شعرك شدي شعرها وخالصين
وطبعًا لو سامحتي أحسن وخلي قلبك كبير.
🍎 «مسن عاوزة عاجة من برة؟»

رسالة sms قد تبدو رومانسية لكنها انتقامية تحذيرية تصل على
هاتفك النقال

(علشان تبطلي تنزليه تاني يجيب البامبرز بعد ما طلع السلم يا مفترية)
🍎 «ليه؟»

سؤال استنكاري! استفهامي؟

بعد طلب الزوجة ل ألف جنيه علشان تجيب عباية جديدة لفرح سامية.
(في هذه الحالة رجاء القبول بأي مبلغ وكفاية تجيبي طرحة جديدة
وطرزي العباية اللي عندك بزراير بيجامته الكحلي)
«بأقول لك إيه»

مع مد حرف الياء.. جملة رائعة تنهي الحوار فجأة وتؤدي إلى هرب
الزوجة مع سماع صوت عجيب

■ ممنوع الضحك ■

وهي تنسحب من أمامه مصدرة صوتًا لولبيًا.. هيء إهيء إهيؤأ

(ده صوتك أنت لما تنوي النكد يا حبييتي عارفاكي أنا عارفاكي)

🍏 «وبعدين بقى اللهم طو لك يا روح»

(ده لما تطولي في النكد)

«ياااه أخيرًا»

لأ.. لأ... مش بيقولك، أي نعم هو فرحان بس هو أصلًا ما خدش باله

إنك سرحتي ولبستي شيشب..

(ده الأهلي جاب جون)

🍏 «أنا بحبك»

«وأنت أجمل ست في الدنيا وباعيش معاك أجمل أيام حياتي»

(وفي الحالة دي خلاص تأكدي إن صينية البسبوسة طلعت تحفة...

تسلم إيدك).



5

ألو. . بحبك

♥ (قبل الجواز أيام كتب الكتاب)

هي لابسه بيجامة صفرا مرسوم عليها تويتي وبتتفرج على صور
الخطوبة

والحو جميل

هو: تررررررر

ہی: آلوو

هو: إزيك يا حبيتي

هـ: إزيك يا حياتي

■ ممنوع الضحك ■

هو: أنا جاي النهاردة... مش مصدق

هي: ولا أنا... ما تنساش باحب أشوفك بالتى شيرت الأورانج اللي

عليه زرافة

هو: يا ريت تلبسي الفستان الفحلقي اللي له ديل وجناحات

وارفعي شعرك لفوق علشان قفاكي بيان.

هي: بس كده... حاضر من عيوني.

هو: خلاص أنا رايح ألبس وجاي حالاً أهه.

هي: وأنا رايحة أعمل لك كيكة الجزر بالشوكولا...!!

هو: طب ياللا اقفلي علشان مش قادر أقفل السكة في وشك،

خايف أقفل على مناخيرك.

هي: لأ. اقفل أنت الأول.

هو: لأ. إنتي.

هي: لأ. بليز إنت.

■ ممنوع الضحك ■

أيوه مين

هو: كل ده علشان تردي كنتي فين؟

هي: هاكون فين يعني في المطبخ

هو: أنا في الطريق، اغرفي الأكل علشان يبرد شوية لاحسن ما

بعرفش آكله وهو سخن.

لأني ميت من الجوع وعائز أناام قبل الماتش.

وحطيلي البيجامة على الكرسي اللي قدام باب الشقة.

والشيشب على باب الحمام ونوري النور.

هي: حاضر، بس أصل...

هو: بس أصل إيه!!

هي: لسه الرز بيتشرب على النار وصينية البطاطس فاضل لها تكة

وتتسبك... والسلطة أهه خلاااص

يعني يا دوب ساعة إلا ربع كده.

■ ممنوع الضحك ■

هو: أmaal أنت كنتي بتعملي إيه طول النهار؟

هي: ابنك مغلبنني ومطلع عيني.. آه ماتنساش تجيب البامبرز
لاحسن هو لابس آخر واحدة، وريحته طلعت وأنا مش راضية أغير له
وخايفة يجيله تسلخات.

هو: مش كنت تقولي من بدري

هي: أأ.. ألو.. قفل السكة في وشي... يا غلبي ياني.

هو: لا ماقلتش... أنا باحبكوا قوي.

هي: ياااه.. أخيراً.. فاكر أيام خطو... ب... أأ... ألو... أنت قفلت السكة.

صح النوم... الجواز مسئولية.

صح النوم... الجواز مسئولية



6

رمضان كريم يا ستات

-الستات والبنات اللي رايعين يصلوا التراويح في رمضان القادم،

إن شاء الله.

بلاش علبة الكيك وصنية الكنافة، وتُرمس الشاي مش لازم تاكلوا بين

الصلوات، كلوا لما تروحوا.

(عارفين إنك شاطرة)

بنتك الصغيرة فرحانة بصوتها زي أصالة وماجدة الرومي، وبتغني

في المسجد وتنط على راس البنات وانتي بتصلي.

وابنك اللي بيسنن سخن ويصرخ، الظاهر سنايه بتاكله والناس مش

بيسمعوا الإمام.

■ ■ ممنوع الضحك ■ ■

(اتفقي مع جارتك، أنت تصلي في المسجد يوم وهي يوم واقعدوا بالولاد وارحموهم)

ما فيش حاجة اسمها محجوز، ما تحطيش الشنطة جنبك وتبرقي للبنات وتقولي محجوز، وتستني جارتك على بال ما تخلص المواعين وتيجي.

(المسجد مش أوتوبيس)

بالنسبة للغلبانة اللي جنبك، مش لازم صباeck الصغير يلزق في صباeck لو بعيدة وبطي تزغزغيها.

رجليك شكلها كده غلط وشكلها وحش وهم بعاد قوي عن بعض.

(مش هاتستحملي وهاتقعي في الآخر)

ما تطلعيش تجري بعد الصلاة بالخمار علشان تلحقي المسلسل من أول المقدمة وتتفرجي على الرقاصة.

(فايدته إيه مرواح المسجد)

بلاش تلبسي العباية اللي بتلمع وتبرق بالترتر والخرز؛ لأنها بتنور في الضلمة والناس بتتخض.

■ ممنوع الضحك ■

(ده مش لولوليسبيي فرح)

بلاش تنزلي تصلي بالإسدال بتاع البيت قماشته خفيفة وببين
الجسم.. إلبسي أحسن عباية عندك.

(إنت مش طالعة تنشري في البلكونة يا شلبية)

بطلي تبحلقي في البنات

وتدوري لابنك على عروسة وتنادي عليهم بصوت عالي.

(بصي من تحت لـ تحت)

وأوصيك بالبنات الهادية الرقيقة اللي على طبيعتها ومش حاطين
مكياج وبيقعدوا ورا)

جاركم أبو أيمن عرف كل حاجة لأنه سمعك في المسجد

من ورا الستارة

وإنت بتحكلي لصاحبتك على مقادير الكنافة بالقشطة والمكسرات

(ها يقول لمراته وحاتعرف سر المهنة وطبي صوتك)

بلاش يا بنات الكعب العالي

■ ممنوع الضحك ■■

لأنه ملفت.. ويعمل حاجات وحشة.

(تريك تراك تريك تراك قدام المسجد والمصلين واقفين ها يبصوا
غصب عنهم ويتفرجوا)

روج وكحل وأحمر خدود وإنت رايحة تصلي..

ليه!

(يارب الإمام يخشع في الدعاء وتعيطي والكحل يسبح)

البارفان بلاش منه في المسجد

وعلى فكرة ما فيش واحد ها يشمه يقوم يحبك فجأة

ويجري وراك وإنت طالعة من المسجد علشان يخطبك من بابا

(اللي بيعي في الإعلانات كله كذب)

لو الفطار كان فيه فتة وخل توم خليك مكانك ما تتحركيش من

البيت وهاتولها هدية

أميين

الرجالة اللي يعلوا صوتهم فيها

■ ممنوع الضحك ■

إنت صوتك حلو وناعم ومسمسم

وده مسجد

وبلاش أوبرا عايدة

قولها بصوت واطي

علشان ربنا يكرمك

في السجود إدعي في شرك

المسجد كله عرف إن ركبك بتوجعك وجوز أختك ضربها بالقلم وإنك

بتدعي عليه بطلوا تتعاركوا على النور وشوية تطفوه علشان الخشوع

وشوية تنوروه وتدوروا على العيال وما تنسوش تنضفوا المسجد وبلاش

ترموا مناديل ورق في الأرض علشان ده بيت ربنا.

وحشنى رمضان.

اللهم بلغنا رمضان



رمضان كريم للرجال

بمناسبة رمضان

الإخوة والشباب اللي رايعين يصلوا في المسجد، ما شاء الله ربنا
يزيد ويبارك.

ممنوع منعًا باتًا تروح المسجد بالشراب اللي كنت لابسه طول
النهار واتعمى تراب، وبعدين مسحت عليه والمية والتراب والهوا
عملوا جريمة..

أنت كده "طاغية"، في ناس بتصلي في الصف اللي وراك وممكن
تحصل إغماءات

في إختراع اسمه "عطر"، وأحياننا يدعى "بارفان" وبينادوه في بعض
العائلات "كالونيا" يا ريت تستخدمه علشان تسعد الناس وتداري الأحزان.

■ ■ ممنوع الضحك ■ ■

الصنادل والشباشب اللي بتركن على باب المسجد بطريقة عشوائية
وتكعبل اللي رايح واللي جاي، وفي الآخر تتعاركوا على الشباشب اللي
شبه بعض وأنتم مروحين.. رصوها بنظام.. كل شبشب جنب أخوه
علشان الزحمة.

ولو مفيش مكان ممكن الصندل يركن صف ثاني، وممكن حد من
الشباب يتطوع وينظم المرور.

اللبس اللي حضرتك قاعد بيه طوال النهار (التريننج المخطط)
ونمت بيه، وصحيت بيه، وأكلت ابنك حمادة بيه، والشوربة وقعت
عليه وبقعته، ما ينفعش تروح بيه المسجد؛ لأن ريحته طبيخ وعرق،
إبس أحسن لبس عندك وانت رايح المسجد.

لو مدام "شلبية" أبدعت في الفطار النهارده، وفي قنابل ومتفجرات
في المحشي يبقى أنت "إرهابي"، والكوارع كانت ممتازة والخل والتوم
والفتنة كانوا حكاية بلاش تنزل، أو أجلهم بعد التراويح رفقًا ورحمة
بالمصلين.

انزل بدري مش لازم تتأخر على بال ما برنامج المسابقات يخلص أو

■ ممنوع الضحك ■

شيكابالا يجيب جون والإمام يكون بدأ الركعة الأولى ودخل في السورة
اللي بعدها، وتجري في الشارع علشان تلحقه قبل ما يركع، رمضان مش
بيجي كل يوم.

وكده كده مصر مش ها تلعب في كاس العالم ريحوا نفسكم.
الشباب الصاعد، بلاش البنطلون الهابط، والسلسلة والأنسيال،
وبلاش تلبس الـ تي شيرت اللي عليه صورة مادونا وأنت رايح تصلي
التراويح.

أكيد لازم تركز العربية وتلحق الصلاة بس بلاش في وسط الشارع،
الناس ها تدعي عليك، وممكن حماتك تتعب والإسعاف تيجي ويكونوا
عاوزين يعدوا من الشارع ده تحديدًا لإنقاذ حياتها بعد ما ضربت صنية
الكنافة لوحدها والسكر على، اركنها بعيد أو روح مشي وما تضايقش
الناس وتسد الطريق، وساهم في إنقاذ حماتك.

بعد ما تصلي وحضرتك واقف منتظر المدام مش لازم تبين لها
إنك قلقان عليها قوي وبتدور عليها في وشوش كل الستات، وقال إيه
باعرفك من العباية اللي أنت لابساها يا شلبية، ومن شوقك ليها بتبص

■ ■ ممنوع الضحك ■ ■

علشان بس تعرف هي مين، هي واضحة جدا بالعباية المشجرة أم كسر والشبشب البرتقاني، بلاش تبخلق وتبص قوي وتدور عليها هي ها تلايقك ها تلايقك.. وبتراقبك على فكرة، علشان الأخوات بتتخرج ولازم تغض بصرك.

ابنك اللي واخده معاك تعلمه الصلاة وهو لسه لا يعقل، دخله الحمام قبل الصلاة علشان ما يجيش في وسطها ويقول لك (عاوز أروح الحمام) والناس تضحك وتروح طالع من صلاتك وتجري بيه، وطببطب عليه وفهمه، لو عمل دوشة، ولو حد بص لك شذرا وقال لك سكتة بلاش تديله بالبونية وتنزل فيه ضرب، وخليه يبطل يزغزغ الناس في رجليها وهم ساجدين وممكن لو حد قال لك حاجة تبتسم وخلص.

الراحة اللي بين الركعات الإمام بيقول نصيحة قصيرة لو شفت أستاذ كمال اللي ساكن في الشارع اللي وراكم مفيش داعي تنط من فوق رقبة اللي قاعدين وتأخده بالحضن وتسأله عن سوسن هي خلاص إتجوزت وها تولد وألف مبروك، واقعد اسمع الإمام.

■ ■ ممنوع الضحك ■ ■

اعمل الموبايل صامت، أو طفّيه خالص واكتمه، وما تطلعوش تلعب Games بين الركعات ولا تبعت رسايل لحد، وبلاش رنة غير لائقة في المسجد،

ويا خوفي.. يا خوفي... لتكون الرنة عشرة بلدي
وكل سنة وأنتم طيبين.



عبقرة الستات

إحنا كستات عباقة الحقيقية واخترعنا أكثر من لفة للطرحه..

الحجاب الفرعوني

وده عبارة عن شوية طرح فوق بعض على شكل هرم ويتظهر البنت
لو قصيرة من أسفل الطرحه بشكل ملحوظ والطرحه دي ما بتتحركش
حتى لو في رعد وبرق وبتدفي في الشتا.

حجاب سم النسيم

وده حجاب مبهج ويوحى بالسعادة والفرحة شبه فساتين صفاء أبو
السعود الجميلة كده بس للأسف في أحياناً جرس بيرن في ديل الطرحه
(آه والله جرس ويرن)

■ ■ ممنوع الضحك ■ ■

علشان لو أنت بتحود من على الناصية بالعجلة هي تهز راسها وترن
الجرس تقوم إنت تسمعها ما تخطهاش.

محباب سوبر مان

وده بيركوله من فوق وشاح زي بتاع سوبرمان وبيثبتوه بدبوسين
على الراس من على الجنبين، وها تلاقيه بيطير وراها.

(لو مراتك وزهقان منها اشتريهولها وزقها من البلكونة وقول إنها
كانت بتقلد سوبر مان)

محباب البنت المقموصة

وهي بصراحة مش مقموصة ولا زعلانة من حد ولا متكبرة ما
تظلموهاش

هي بس خايفة تهز راسها فوق وتحت وتقول أهلا وسهلا إزي
حضرتك، وما تقدرش تبص يمين لما تنادي عليها، وتقول أيوه لأن رقبتها
ها تبان، والطرحة يا دوب خنقاها ومدخلاها في رقبة الفستان بالعافية.

■ ■ ممنوع الضحك ■ ■

الحجاب الفسفوري

وده مفيد جداً لو النور ائقطع وإنتموا في الشارع حاتعرف مراتك على طول وممكن تنشئ على دماغها وتحذفها بأي طوبة وأهي فرصة وما حدش شايفك.. وأول ما النور ييجي بلاش تفرح وتقول هيبويه لأنها هاتعرف.

حجاب صندوق الدنيا

وهنا ها تلاقي مفاجأة تحت الطرحة علبة سمنة روابي أو علبة آيس كريم فاضية،

والنوع ده مفيد جداً؛ لأن ممكن تشيلي فيها أي حاجة، الموبايل مفاتيح العربية سندوتشات وممكن كتاكيت.

(كتاكيتو بني)

عبقرية دي واللا مش عبقرية يا متعلمين يا بتوع المدارس؟



9

شايفاك

أيوه... هي شايفاك

شايفاك وأنت بتكور الشراب وترميه تحت الكنبه.

شايفاك وأنت بتعمل نفسك مش واخد بالك من قشر اللب اللي

وقع في الأرض.

شايفاك وأنت بتقول لها بحبك والأكل ها يقع من بقبك

(مش لازم تقول لها وإنتموا بتاكلوا)

شايفاك لما رجعت من الشغل وأنت بترمي القميص وتحذف الجزمة

(ها تخبط في وشها على فكرة كانت واقفة وراك)

شايفاك وأنت بتاكل الزبادي اللي بالفراولة

■ ممنوع الضحك ■

(هي قالت لك تأكله لبنتك مش إنت اللي تأكله)

شايفاك وأنت صاحي من النوم وشعر راسك مسافر وخدودك واردة

شايفاك وأنت بتتفرج على نشرة الأخبار

(وإنت مركز مع المذيعه، استني لما المذيع يبجي واتفرج)

شايفاك وانت بتاكل بطيخ

(اعمل نفسك مش شايفها ولا يهكم دي مفترية وبتعمل أكثر من كده)

شايفاك وأنت بتجري على الموبايل قبل ما هي تمسكه علشان

تفتح رسايل صحابك

(بتعايبوا على الستات ليه في النكت)

شايفاك وأنت بتتفرج على صور خطوبة نيفين بنت خالتك

(كانت فاكهه الحجاب ارمي الصور بسرعة)

شايفاك وأنت بتبص لعيون زميلتك وأنت بتكلمها لما زرتوهم في البيت

(حاول دايمًا تبص للنجفة لما تكلم ست قدام مراتك)

■ ممنوع الضحك ■

شايفاك وأنت بتتفرج على ماتش الأهلي والزمالك وبتبرق للعيال
وهي بتعدي من قدام التلفزيون وأنت بتتفرج

(أبو تريكة جاب جون)

شايفاك وأنت بتعد الفلوس من وراها

(هات لها هدية)

شايفاك وأنت بتدعي عليها.. أأأ.. قصدي بتدعي لها بعد صلاتك

شايفاك وأنت بتداري فرحتك.. أأأ.. قصدي دمعتك وهي عيانة

شايفاك وأنت بتشاور لمامتك علشان ما تاكلش من البيتزا اللي هي

عاملاها

شايفاك وأنت داخل بجزمتك في الشتا بعد ما مسحت الأرض

شايفاك وأنت بتهرب منها وهي بتغسل المواعين

(مش عاوز تساعدها ليه)

شايفاك وأنت عامل نفسك نايم علشان ما تشيلش ابنكم اللي طول

الليل يعيط

■ ■ ممنوع الضحك ■ ■

شايفاك وأنت بتتاوب وعرفت إنك شايل اللوز
(مش لازم توريتها ضرس العقل المسوس على فكرة)
شايفاك وإنك بتضحك
شايفاك لما تحبها
خد بالك بتراقبك هي والعيال



10

شايفك

هو شايفك وأنت بتبرقي لابنك علشان كب العصير على السرير.
وشايفك وأنت بتكزي على سنانك لما ابنك كتب في الواجب حرف
السين معووج ونازل من على السطر
(يا شريفة).

وشايفك وأنت بتخطفي الأكل من العيال
(قلنا هاتي لك كيس شيبسي معاهم وكل واحد ياخذ نصيبه)
وشايفك وأنت بتكلمي مامتك في التليفون وعوجتي بقك وإنك
بتحكي لها على زيزي بنت عمك
(يا تحفة)

■ ■ ممنوع الضحك ■ ■

وشايفك وأنت بتاكلتي سندوتش الطعمية

(أخبر واحد في الأربعة)

وشايفك وأنت بتتاوبي وفاتحة بقمك زي سيد قشطة

(يا ستر يا رب)

وشايفك وإنك بتدوري على القملة.. ق.. قصدي على التوكة اللي

في شعرك

وشايفك وأنت رابطته راسك وأنت بتنظفي الشقة

(ويحاول ينسى)

وشايفك وأنت بتنطقي الإنجليزي غلط وأنت بتكلمي رانيا

وشايفك وأنت ماسكة الشبشب وبتذاكري للعيال

وشايفك وأنت بتبحلقي في الأرض وتدوري على دبوس الطرحة

اللي وقع منك

(قلنا خدي بالك واشبكيه في حاجه تتساف)

وشايفك وإنك بتشدي بنتك من شعرها علشان خدت الريموت

■ ■ ممنوع الضحك ■ ■

وقلبت القناة وجابت المسلسل اللي انت مش عاوزاه يشوفه علشان
البطلة حلوة

وشايفك وانت صاحيه من النوم

(قمر أربعنااشر)

وأول ما النور بيتقطع بيفرح وبيقول هيبه يا رب يفضل مقطوع..

وأول ما يبجي هو اللي بيصرخ

وشايفك وإنك ماسكه الكتاب وقاعدة دلوقتي زي الأروبة

(اتعدلي وابتسمي وحطي رجل على رجل)

على فكرة بيراقبك

آه والله

وربنا ما يحرمكوش من بعض..



11

جبر الخواطر

في حاجه اسمها كده.. جبر الخواطر
يعني لما تلاقي جوزك جايب لك هدية بسيطة على قد فلوسه
تفرحيه وتبينني إنها عاجباكي..
(اصبري ولما يكون معاه... ها يجيب لك كتير)
يعني تعمل لها مفاجأة وتتجوز عليها.
(... أأا.. قصدي تجيب لها هدية)
يعني لما تلاقي مراتك عامله كيكه وحرقتها تعمل نفسك مش واخذ بالك
وتأكلها وإنت مبتسم وتقول تسلم إيدك يا حياتي.
(ابلع بشاي بلبن ببساعد)
يعني لما تلاقيها ضاربة شعرها في الخلاط وحاطه كاري علشان

■ ■ ممنوع الضحك ■ ■

يصفر واشترت توكة وفستان جديد تفرحها وتقول لها إيه ده هو القمر
جه عندنا يا ولاد.

(حاول ما تضحكش.. ممكن تبص للنجفة وأنت بتقول كده)

يعني لما تطخن بعد الولادة ما تقولهاش في وشها وتجرح شعورها
انت لازم تخسي يا كلبوزة.

(اتصال من مجهول إنك بتدور على عروسة حاخسها النص)

يعني لما يزعلك ويعمل نفسه عيان تسامحيه وتعملي نفسك
قلقانة وتعيديها وتفتكري له الخير وتجري تعملي له كمادات.

(بلاش الحقن)

يعني لو حابة تتكلم اسمع لها.

(اسألها وزنها كام وهي هاتتكم وتبطل وتقوم تعمل لك شاي)

يعني لو هايغير القناة علشان الماتش تقعدى ساكنة وتشاركه
اهتماماته.

(ممكن تدعي على الفريق اللي بيشجعه في شرك وخدي راحتك)

يعني لو طلب أكلة تطبخيها فوراً.. علشان هو حبيبك.

■ ■ ممنوع الضحك ■ ■

(زودي السمنة خليه يطخن علشان البنات ما تعاكسوش)

يعني تفكره بأول مرة شففيه لما جه يطلب إيدك.

(انسي القميص الأخضر والبنطلون البني هو مش ها يعمل كده ثاني)

يعني تفكرها بيوم ما خرجتوا أول مرة بعد كتب الكتاب.

(معلش انسى اللي حصل في المطعم كانت جعانة ما تحكيش

الجزء ده)

يعني لما تنادي عليها تدلعه باسم جميل.

(لو فتحية قولها لها يا فيفي.. عنايات يا توتو.. انشراح يا شوشو..

أشجان يا جيجي.. وكده)

يعني تقولي للولاد بصوت يسمعه لما يرجع من الشغل ويفتح

الباب بابا حبيبنا القمر جه.

(هو كويس ما تقلقيش حا يضحك بعد شوية هو بس خد باله من شعرك)

جبر الخواطر سهل... بس إحنا بننسى



12

تعرفني إزاي إن جوزك بيحبك

♥ (دأيمًا بيتسابق معاك عاوز يفرمك)

ولما تلاقيه وانتوا راجعين من كارفور وشايلين الأكياس بيضربك
مقص برجله ويطلع يجري على السلم..

♥ (بيحبك وعاوزك تدخل في الجنة)

مش إنت تصحي على صوته وهو بيلطش لك بالأفلام ويقول لك..
قومي صلي قيام الليل.

♥ لما تطلبني حاجة مش بينساها

لما يقول لك تستنيه كل يوم ورا الباب علشان يبقى وشك أول
حاجة يشوفها لما يدخل..

■ ■ ممنوع الضحك ■ ■

(ويرزحك في صباع رجلك الصغير غصب عنه.. غصب عنه ما انت
كمان فرمتي رجله غصب عنك)

لما يصحى قبلك ويمشي على طراطيف صوابعه علشان ما يزعجكيش
♥ (مش بيرب إطلالًا)

لما ينام بعدك ويظمن عليك ويغطيك بنفسه
♥ (أخيرًا نام... أحمدك يا رب)

لما تلاقيه فجأة وانتوا بتأكلوا خطف من إيدك ورك الفرخة ونزل
فيه أكل

♥ (هو بس مبي يأكلك من الحمة اللي إنت أكلتي منها
بشفايفك... رومانسية وكمه)

لما تلاقيه هبش من إيدك كباية العصير

♥ (عاوز برضه يشرب من الحمة اللي إنت شربتي منها
أصله ييهبك)

يجيب لك طلبات البيت

■ ممنوع الضحك ■

♥ (ماعد ابرطمان النوتيلو اللي طلبتيه)

لما تخرجوا بيشيل الولد على قلبه

♥ (شيلي إنت الأكياس ياحلوة... الولاد بتبهدك الطرع

والهدوم وعافظي على شياكتك)

بياكلك بإيده

وبيزنق دماغك في ركن المطبخ ويحط اللقمة في بؤك

♥ (إوعي تفتكري إن ده علشان تبطلي رغي لا سمح

الله)

بيشكر فيك قدام أهله

علشان بيجبك والله مش علشان ما يشمتوش فيه)

بيجيب لك هدايا

♥ (نزي السوار اللي بيكسرب.. فاكراه)

بيفليكي.. أأأ... قصدي بيسرح لك شعرك ويعمل لك ضفاير

■ ممنوع الضحك ■

♥ (رومانسي)

بيفسحك ويوديكي البحر

♥ (مش ذنبه... انت اللي اتكعبلتني في العباية وكنتي ها

تغرقني)

بيكتب فيك شعر

♥ (الملزونة يا أما الملزونة)

أهو ده الحب










شفتي بقي

وربنا يحبه فيك كمان وكمان... اللهم لا حسد.



13

حاجات ما تتنسيش

- كل واحد فينا عنده ذكريات حلوة.. وحاجات جميلة ما تتنسيش.. 
- صاحبك الطيب اللي كان قاعد جنبك في ابتدائي. 
- كراسة الرسم والألوان الشمع. 
- جزمة المدرسة الجديدة اللي بتوجع وتعمل بقبقة في رجلك. 
- يوم تجليد الكتب والكراسات. 
- ريحة الأقلام الرصاص الجديدة. 
- البراية والأستيكة أم ريحة حلوة. 
- كيس الساندويتشات وجرس الفسحة. 
- كباية المية اللي بتتفتح وتتقفل ولها غطا. 

■ ممنوع الضحك ■

- ♡ حصة الألعاب والفرحة بالصفارة.
- ♡ رحلة الأهرامات وصورتك عند أبو الهول مع صحابك.
- ♡ شف الخرايط وتلزيقها في الكراسيات.
- ♡ ريحة كحك العيد وقعدتك جنب مامتك وهي بتعمل البسكوت ولما تديك عجينة وتبوظها وتخبزها لك وتآكلها وأنت فرحان.
- ♡ فانوس رمضان اللي فرحت بيه وطفيت النور علشان تتفرج عليه مع إخوانك.
- ♡ شكل فلوس العيدية وأنت بتعدها.
- ♡ مراجيع العيد وألوانها.
- ♡ آخر لحظات قبل الفطار في رمضان وأنت بتحلم بالمية والعصير.
- ♡ فوازير رمضان وأنت صغير وأنت بتفكر في حلها وتكتبها.
- ♡ لمة العيلة والسهر وصوت ضحكهم ورنتها وحكاوي زمان وذكرياتهم وأنت بتتنعس وتنام على رجل مامتك.
- ♡ اللعب مع ولاد عمك والعراك معاهم وضربهم والغيرة الشقية.

■ ممنوع الضحك ■

- خروف العيد وصوته وهو بيماً
- السفر في العربية أو القطر وأنت فاكر إن القمر ماشي معاك
وبتعد الشجر على الطريق والهوا بيخبط في وشك.
- المصيف والبحر والشمسية والطيارات الورق والفريسكا
والجردل والجاروف وبيوت الرمل.
- الذرة المشوي وأنت واقف مستني تشتري وماسك الفلوس في
إيدك وصوت فرقعته في النار والبياع بيهوي على النار بكرتونة.
- حضن تيتة وضحكة جدو.
- مفاجأة خالتو وهديتها.
- طعم الآيس كريم ولوليتا بالفراولة.
- كارت عيد الأم اللي كتبته لمامتك وباستك بوسة كبيرة وحضنتك
وفرحت بيه.
- صوت مفتاح الشقة لما باباك يرجع وتجري أنت واخواتك على
كيس الفاكهة اللي معاه علشان تشوفوا فيه إيه.

■ ■ ممنوع الضحك ■ ■

النور لما يقطع واللعب بالأيدي قدام نور الشمعة والضحك 

على شكل الخيال على الحيط.

الفرحة وصرخة هيبه لما النور يبجي ثاني. 

وحشتني نفسي وأنا صغيرة.



14

حصار الغربة

حقيقية السفر، وصوت الطائرة، ودموع أمك، ودموعك، إنها بداية الرحلة. تلك اللحظات عندما تغادر أرض الوطن ويرحل فيك الوطن! فتحمله هنا في صدرك وتشعر لأول مرة أنه يوجعك. أجبرك على الرحيل بغلق الأبواب.. تقلص فيه كل شيء حتى الرغبة وغاب الأمن والأمان.. الآن ترحل، تاركا خلفك، فصول الربيع الحلوة، ونسمات الشتاء الباردة، وبعض الذكريات. ستجد نفسك في أرض أخرى كنبته خضراء اقتعلت بجذورها من أحب بقاع الأرض إليها، فتمزقت الأطراف ونقلت لتربة أخرى وسقيت بماء آخر طعمه يختلف عن ماء نيلنا الحبيب، ذاك الذي لوثته بقايانا لكننا نحبه، وسنظل نعشق طعم مائه العذب.. ستعيش... لكنك ستشعر بوحدة..

العيد سيكون صوته بارداً على الهاتف.

■ ممنوع الضحك ■■

رمضان لن ترى زينته في الشوارع، ولن تقف مبتسما وأنت تراقب تعليق الفوانيس. ستغيب رائحة الفول والسهرة للسحور. حزن أمك سيكون على شاشة الحاسوب، لكنك ستشعر بدفء دموعها لأنك ستبكي.. ربما ستفاجأ بخطبة أختك، أو بزفاف صديقك، وسيرسلون لك صورة وتعليق. ستضحك أحيانا... لكنك ستدخر الفرحة حتى تعود وكأنك لا تراها ملائمة لغربتك. وإن عدت سيبتعدون قليلا لأنهم يظنون أن كل أيامك كانت ضحك وفرح ومرح ونقود، وربما يبخلون عليك بالابتسامة. سيراقبون هاتفك الجديد وساعة يدك وحروف الماركات الشهيرة المخطوطة على سترتك.. ستشتري كثيرا وكأنك تبحث عن شيء يفرحك.. وتدخر مالا ستعقب فيه بشدة وستدفع ثمنه من عمرك وسيفوتك الكثير.. وسيتوقعون أضعاف أضعافه فأنت (سافرت بلاد بره ومعاك فلوس). سيشككون في وطنيتك.. ولو ناقشتهم سيسكتونك لأنك بعيد ولا تشعر بمعاناتهم. رأيك الذي كان هاما ويؤخذ به سيكون أحيانا رأيا فقط، يُسمع ورغم صحته لن ينفذ؛ لأنهم سمعوه بعد فوات الأوان. أقرب الأصدقاء سينشغلون عنك، ستبدأ برسائل ومكالمات عميقة وحارة، وستعتاد ويعتادون على

غربتك وستبقى علاقات الحب العميقة أغلبها ذكريات حلوة. سترتبط
بوطنك الجديد، لكنه سيعاملك معاملة الطفل اللقيط، فأنت لا تشبه
أبناءه، لكنه سيرحب بك ما دمت تنتج وتعمل.. واحذر فربما يلفظك في
لحظة على قارعة الطريق، فأنت غريب. ربما ستمل أحيانا من إجازاتك؛
لأن الجميع سيدخر كل المشكلات طوال العام ليقصها عليك بتفاصيلها،
وسينسون أنك جئت لترتاح. مطلوب منك معاملة الجميع خلال زيارتك
القصيرة حتى لو مر علي المناسبة شهور طويلة، ولن يشعر أحد بمرضك
وأنت وحدك في غربتك. غربة مرة.. لا تحليها إلا تلك الوجوه الباسمة
التي ستلتقيها في المساجد فتعرف فلانا وقد أوجعه وطنه أيضا في
صدره فتبدأ صداقات جديدة وحب في الله من نوع آخر لم يركض من
قبل على أرض المدارس ولا ساحات رياض الطفولة. عندما تمرض هم
سيزورونك، ستطبخون معًا وتخرجون معًا وتضحكون معًا، وكل منكم
يحمل قصة من ماضيه ربما يسامركم بها في ليلة.

ستلدين في غربتك وربما تلتفتين فلا تجددين أمك لكنك ستأكلين
من يد صديقتك السورية والأخرى المصرية وتلك الفلسطينية فكلكن

■ ممنوع الضحك ■

غريبات. ستكونون أسرة كبيرة، وستجتمعون في رمضان، والعيد سيكون
بطعم مختلف. ستربتون على أكتاف بعضكم وتطيب بعض الجروح.
ستتحرر الآن من قيدك... ستضحك من قلبك وستفرح هنا حيث
أنت.. ستحب حياتك وتعود كل عام وأنت أقوى، ولن تؤلمك ردود
أفعالهم لأنك ستفهم...

فالوطن في الحقيقة ليس في الأرض ولا في الحدود ولا في العلم،
فكلها رموز.... الوطن فيك أنت.. (أنت الوطن)..

اللهم رد كل مغترب لوطنه، واجعله وطنًا آمنًا مطمئنًا،
واحفظ أحبابنا في كل بقاع الأرض



15

الليلة الأخيرة

أوقف سيارته أمام باب البناية التي يقطنها مع أسرته الصغيرة،
هرول على الدرج مشتاقا لابنتيه الحبيبتين، أخرج المفتاح من جيب
سترته وأداره في الباب بهدوء وسار على أطراف أصابعه.
كان يهمّ بدخول غرفته عندما تناهت إليه همهمة منخفضة قادمة من
غرفة البنات، كتم أنفاسه ووقف ينصت لزوجته التي كانت تتحدث إلى
شقيقتها على هاتفها النقال بعد أن نامت ابنتها.. حيث هتفت غاضبة:
-ها أربيه، والله لأربيه.

شعر برجفة تجتاح جسده وازدرد ريقه بصعوبة فأردفت وهي

تتوعد:

■ ممنوع الضحك ■

-مش ها أخليه يأخذ نفس حتى في البيت.

ضاقت أنفاسه وشعر بألم شديد في صدره فأكملت:

-أكل إيه اللي ها اعملهوله... وأتعب نفسي ليه!!.. يارب يموت

مسموم.

وضع يده على معدته وشعر بتقلص شديد فأردفت بصوت حاد:

-لا، مش أول مرة، دي اتكررت كثير قدام عيني.

وضع يده بهدوء في جيب بنطاله، وأخرج الهاتف وقام بإلغاء

المحادثة التي كانت بينه وبين "ريري" تلك الفتاة الخليعة التي تثرثر

معه على صفحة الفيسبوك بكل ما فيها من عبارات غزل وحب وغرام.

وسمع زوجته تقول:

-إيه.. أصبر!.. أصبر ليه والدنيا تخرب وبيتي يتبهدل.. لالال.. أنا

صبرت خلاص، وقلت هايسيننا لوحده وسهلت له كل الطرق.

حدّق في الظلام وصارت دقات قلبه كطبول الحرب وعاد لهاتفه،

وقام بإلغاء الصداقة التي بينه وبين تلك الفتاة، بينما عادت زوجته تهتف:

■ ممنوع الضحك ■

-ها أضلمها له ومش ها أخلي أي حاجة في البيت... ها أموته من الجوع.

ابتلع ريقه بصعوبة وهي تكمل:

-لأ.. وليه!، إستنى... ما أنا أقدر عليه لوحدي ولا يهمني.

بدأ يرتجف، وقرر أن يسير ببطء نحو باب البيت ليهرب منها، بينما كانت تقول برتابة:

-خلاص، ها أسيك بقى لأحسن الوقت عدّى ولازم أقوم.

سار خطوتين، فقالت:

- طبعا مش ها أحسس البنات، أنا نيمتهم بدري النهارده؛ لأنني خلاص نويت له على نية سودة.

أسرع مهرولا برعب نحو الباب وقد ارتفع صوتها، قائلة:

-الليلة... لازم تكون آخر ليلة في حياته.

كاد أن يدير مقبض الباب لولا أنها اقتربت وهي تضع الهاتف على أذنها فرأته، وقالت بعد أنهت سريعا المكالمة مع شقيقتها وابتسمت:

■ ■ ممنوع الضحك ■ ■

-حبيبي، إتأخرت ليه؟

في فار دخل المطبخ تاني... عاوزاك تساعدني علشان نقتله سوا

يا حبيبي

قال بحماس وصوته يرتعش:

-والله لأدبحه وأكسر دماغه... هو فين؟

قالت بمرح:

-اقفل الموبايل الأول وركّز معايا، وما تقعدش تقلّب فيه زي كل يوم

قال بثقة:

-لا ما أنا خلاص... حرّمت يا حياتي



16

الشيخة فيفي

ذات صباح في بيت هاديء دار الحوار التالي:

- حبيبي صباح الخير

- استغفر الله العظيم أنت ما تعرفش إن صباح الخير بدعة.. الشيخ

عبد الهادي اتكلم عنها في كتاب

الكلام الأخير في حكم صباح الخير

-طب خلاص السلام عليكم.

- قولها كاملة علشان الثواب وعليكم السلام ورحمة الله وبركاته زي

نصيحة الشيخ عبد السلام في كتاب

آراء الإمام في كيفية إلقاء السلام.

■ ممنوع الضحك ■

- ودول بتسمعيهم في الراديو يا فتحة.
- قول لي يا فيفي
- هي فيفي دي مش بدعة؟
- طب ما تقولهاش قدام إخوانك
- دول الشيوخ اللي بيعجوا في التلفزيون.
- صحيح، كويتي لي القميص والبنطلون.
- معلش نسيت أصلي كنت بصلي قيام ليل وسهرت لحد الفجر.
- ما شاء الله طيب النهارده الخميس مش هنروح لأمي ده أنت ما شفتيهاش من شهر.
- لأ روح أنت وخذ الولاد أنا رايحة درس الشيخ همام
- في كيفية صلة الأرحام
- خلاص لما ترجعي اعلمي لنا بسبوسة بالأناناس والكرام شانتية
- لاحسن أكلتها عند واحد صاحبي ونفسي فيها.

■ ■ ممنوع الضحك ■ ■

- استغفر الله أنت ما تعرفش إن الكريم شانتیه فيه شبهة في مكوناته إنها تحتوي على ودان الخنزير.
- أعوذ بالله.. بلاش.. طب وبالنسبه للبسبوسة.
- من اسمها أهه (باس.. بوسة) أنت ترضى إني أعملها.
- لا طبعا.. أقنعتيني الصراحة.. طيب هنفطر والا بدعة.
- هنفطر طبعا تحب تفطر إيه.
- والله أنا جعان جوع السنين اعلمي أي حاجة مش بدعة ولا حرام وأنا هاأكلها.
- طب ها أصلي الضحى الأول وارجع لك.
- ما تتأخريش.



بعد ساعة..

تيكيلام تيررين تيكيلام

■ ممنوع الضحك ■

(صوت المعلقة وهو يقلب الشاي وهي داخلة بطرحة الصلاة).

- إيه يا حبيبي أنت عملت شاي.

- وفطرت كمان يا ست فيفي.

- أنا يا دوب قرئت الورد بتاعي. وكنت جاية خلاص أعمل لك الفطار.

- ولا يهمك.. بأقول لك إيه.

- نعم يا حبيبي.

- هو الشيخ همام قال إيه عن تعدد الزوجات؟

- هتروح لمامتك الساعة كام يا حنفي.



17

حوار دسم جدًّا (أفكار، ملاحظة)

دَقَّت الساعة معلنة بحذر أنها الثالثة عصرًا،

حلَّق أفراد أسرة الأستاذ (حنفي) مدير عام مصنع الأناقة للغزل والنسيج حول مائدة عامرة بما لذَّ وطاب.

اقتربت زوجته المصون وهي تسير بخطواتها البطيئة وبين يديها طبق كبير تكدس عليه ما لذَّ وطاب من المحمر والمشمر.

مالت الأم وشغلت حيزًا كبيرًا من الفراغ، فمال أبنائها يمينًا ويسارًا ليفسحوا لها الطريق لكي تضعه في وسط المائدة وجلست مُخدَّثة رجَّة هائلة فاهتز المرق واندلق بحياءٍ من السلاطين المتأرجحة بدلال.

ودار حوار دسم جدًّا:

- بسم الله الرحمن الرحيم.. بسم الله يا أبو محمد.

■ ممنوع الضحك ■

- الله! ريحة برام الرز هاييلة يا ماما

- بالهنا والشفا يا حبيبتي.. ما تتقليش علشان العريس اللي جاي

بالليل

أجابت (نوسة) وهي غاضبة بعد أن أمطرت المائدة بحبات الأرز وهي

تمضغ قطعة اللحم التي ألقت القبض عليها مدسوسة في البرام المعمر:

- ليه هو أنا داخله امتحان.. اللي مش عاجبه ما يبصش.

ورفعت حاجبها الأيسر ثم أردفت قائلة:

-أنا كده زي القمر.

أشار الأستاذ حنفي إلى ابنته بربع الرغيف المتبقي في يده، بعد

أن قضى على بقيته، وهو ينقنق غارقاً في طبق الباذنجان المخلل الذي

تمددت أصابعه في خنوع وهي مستسلمة لنظرات حنفي المفترسة، وقال:

- بيقولوا عنده شقة يا نوسة، بس مش هايقدر يدفع مهر كبير، يا

دوب الشبكة، بس والله شاب محترم ويعرف ربنا، وكمان شافك يا نوسة

أكثر من مرة ومعجب بأخلاقك وحجابك.

رفعت أم محمد رأسها فجأة ونظرت إلى الجميع نظرة خاطفة وشفطت

■ ممنوع الضحك ■

الشوربة من الملعقة شفطة لولبية محدثة صوتًا بديعًا رنانًا وقالت:

- كان نفسي يندفع لها مهر زي نوال بنت أختي، أمال إيه.. هو أنا بنتي شوية؟

ابتسمت نوسة بعد معركة جانبية مع ورك الفرخة المأسوف على شبابها وقالت وهي ترفع يدها ممسكة ببقايا الدبوس قائلة:

- أنا نفسي في فرح كل الناس تتكلم عليه، وعاوزاه في فندق كبير، وعاوزه العريس شعره ناعم وبيفرقه من النص، ويوم الخطوبة يلبس كرافته برتقاني لون فستاني اللي هايكون بديل.

ابتسم شقيقها محمد ابتسامة جانبية وقال بصوت خافت:

- ديل!!.. هو أنت ناقصة؟

قامت نوسة بتوجيه ضربة حرّة مباشرة لصدر محمد، فاهتزت المائدة، وتبادلت أصابع الكفتة نظرات الاستغاثة مع وركالفرخة، واستمر الحوار..

لوح حمدي بالخيار التي استشهد نصفها على شفتيه وقال:

- أنا باقول مفيش لازمة للأوتيل والفرح والكلام الفارغ، وكفاية يكمل شقته وأهو تلبسي فستان أختك فيفي.. طالما الولد صالح وتقي ويعرف ربنا.

■ ممنوع الضحك ■

ابتلعت نوسة ما في فمها ورفعت حاجبيها وقالت:

- إשמعني أنا يا بابا؟... وبعدين أنا لازم أخس النص علشان ألبس
فستان فيفي أصلاً!

انتهاز محمد الفرصة وقال:

- بس أنت خسي وأنا أركبك ديل... قصدي للفستان.

التفتت إليه موجهة ضربة ركنية لخدّه الأيسر فانهارت حلة المحشي
متعاطفة مع آلامه، وتبادل حنفي مع زوجته النظرات، وهنا قررت الأم أن
تتناول أطراف الرغبة..

أأ أقصد الحديث لكي تشرح لها عملياً.. فقامت بإدارة الديك الرومي
ليكون أمامها مباشرة، وغرست السكين فيه وقالت وهي تعض بأسنانها
العلوية على شفتها السفلى:

- لازم نصبر عليه لحد ما يستوي، ونوطي النار.

أضاف الأب وهو يتناول طرف الرغبة الآخر:

- وبعدين ما نكترش فيه الملح لأحسن يتهري ويطفش..

وأكملت زوجته:

وبعد ما يستوي ويبقى في إيدينا ويسيب لنا نفسه كده، نمسكه كده بالشوكة، ونقطع فيه زي ما احنا عاوزين، وممكن كمان نحمره أو نشويه.

سألته نوسة بخوف بعد أن أحست بتأنيب الضمير:

- هو مين يا ماما؟

أجابتها ببساطة، وهي تلوح بالسكين:

- الديك طبعًا يا نوسة..

ارتبكت نوسة وتأملت قطعة الديك الرومي التي رفعتها أمها على طرف السكين وألقته في طبقها المستدير.. ونظرت إليها بحول شديد.. وتذكرت كيف يعود أبوها من عمله وعلامات الإجهاد على وجهه. ثم التفتت إلى أخيها محمد وتذكرت كيف ينام على الأريكة وهو يشاهد التلفاز لمدة ربع ساعة ليتستيقظ على صوت الملعقة وهي تصطدم بكوب الشاي، وأمه تقلب السكر.. ليتجرعها بسرعة وهي ساخنة، ليهزول إلى عمله الآخر الذي لجأ إليه ليحاول إكمال ثمن مقدم شقة بسيطة مكونة من غرفتين وصالة؛ ليخطب فتاة أحلامه، فأزاحت الطبق وقامت وهي تمسح آثار الجريمة من على فمها وقالت:

■ ■ ممنوع الضحك ■ ■

- ماما.. أنا خلاص هابتدي ريجيم من بكرة، بابا.. أنا موافقة على كل حاجة، وكمان هالبس فستان فيفي.. بس يارب أعرف أخس، محمد يا أخويا، ألبس إيه النهارده؟

رفع محمد رأسه ونظر إليها بحنان، وقال:

- أي حاجة من غير ديل ومش برتقاني ها تبقى حلوة.. وعلى فكرة أنت مش طخينة قوي، ده أنت زي العسل.



عريس بوسي

-يا بوسي يا بسبوسة

-أيوه يا ماما

طنط تهاني الخاطبة جت ومعاها صور شوية عرسان وأنت تتفرجي

وتنقي وتختاري.

- إزيك يا تونت

-أهلاً يا بوسي والله تونت طالعة من بقبك زي العسل.. خدي شوفي

كده على طول إيه رأيك في العريس ده.. مهندس بترول وعنده 28 سنة

واسمه تامر.

- لا. ده حواجه بتسلم على بعض.. مش عاجبني

-طب مايسلموا براحتهم.. مش اخوات..

■ ■ ممنوع الضحك ■ ■

طب بلاش خدي ده دكتور أسنان وعنده ستة وعشرين سنة واسمه وسيم.
- لا ده رموشه قصيرة وعنده وذن أكبر نص مللي من الثانية.. مش

عاجبني

- طيب شوفي شوفي.. ده بقى مش هاتتكلمي ولا تنطقي.. رامي..
مدرس ألعاب.. شعره سايح أهه والأوصة على جنب أهه سايحة

على عنيه

وممكن أكلمهولك يفرق لك شعره من النص يوم الخطوبة.

- لا شكله بلدي وفلاح

- فلاح!

طيب استني شكلك عاوزه عريس كده أستاذ ومهندم.. ما فيش غيره

- هاتي يا تونت وأنا أنقي لوحدي.

- خدي يا ضنايا الصور كلها.

- ده كويس أبو عين خضرة ده صحيح شعره مفلفل شوية بس مش

مشكلة.. اسمه إيه.

■ ممنوع الضحك ■

- زين ما اخترتي يا بوسي.. اسمه جعلص أبو المناديل ده دكتور
بيطري قد الدنيا وغني ومؤدب وعيلتهم كبيرة قوي من الشرقية.
- لالالا.. مش عاوزه جعلص اسمه مش عاجبني.. أنا عاوزه ده.
- وريني.. آآآاه.. معلش يا حبيبتى ده خطب خلاص.
- طيب حاطه صورته ليه... طيب ده اسمه إيه؟
- بس ده الأستاذ حنفي.. طلباته مختلفة شوية يا بسبوسة بلاش منه.
- ليه يعني يا تونت؟ ده حتى عادي جدًا وخدوده كبيرة.
- عاوز واحدة شعرها أصفر وعنيها خضرة وصارخة الجمال ومتفجرة
الأنوثة... مممم.. وأنت جمالك هادي ياختي ومش بيصرخ.
- طيب خلاص هاوافق تامر اللي حواجه إخوات يبجي وأمري لله
هاستحمل منظره.
- طيب هاتي بقى بياناتك بالكامل استني لما أطلع النوتة.
- اكتبني يا تونت.. أنا الحمد لله وما شاء الله عليه ربنا يحرسني
معايا ليسانس وباحضر الماستر

■ ■ ممنوع الضحك ■ ■

- يا ساتر يا رب بتحضري!!! ليه يا بنتي.. اللهم اجعل كلامنا خفيف عليهم.

- وباحب القراءة والرسم على الزجاج.

- حلو وأهو تلوني الكاسات والكبايات.

- وعندي مدونة على الإنترنت

باكتب خواطري.. وأكاونت على الفيسبوك.

- وماله يا حبييتي هاتي كل اللي نفسك فيه.. طيب بتعرفي تطبخي؟

- طبعًا ومتابعة الشيف شريني

- ولك في شغل البيت يا بسبوسة؟

- ممم.. بدأت يا تونت وعملت إمبراح لماما سندويتش جبنة

بطماطم.

- طماطم.. !!

طب طلباتكم كده في الشبكة والمهر والحاجات دي إيه علشان لو

■ ممنوع الضحك ■

الباشمهندس تامر سأل.

- أنا متواضعة جدًا

وإحنا هانسهل عليه كل حاجة.. شوفي يا تنتوتة

عاوزه شبكة الماظ زي ريهام،

ومهري مايقاش أقل من سوزان،

والخطوبة تكون في فندق كبير زي هوايدا،

والفرح كمان زي إلهام،

وشهر العسل في تركيا زي علا،

وعاوازه عنده عربية زي خطيب إبتسام.

-مين كل دول يا بوسي؟

-بنات عمي وخالي.

-الا صحيح أنت اسمك الحقيقي إيه يا بوسي؟

-لازم يعني يا طنط

■ ■ ممنوع الضحك ■ ■

- أيون يا حبيبة تونت
- باتعة مصباح الشحات أبو نجمة.
- ومش عاجبك جعلص....عجبي!



19

سامح

سامح شاب طيب ويبدور على عروسة.. في يوم مامته ندهت عليه:

- سامح سامح.

- أيوه يا ماما.

- طنط تهاني الخاطبة جت تعالى قول لها على مواصفات العروسة

اللي نفسك فيها.

- إزيك يا طنط.

- بسم الله ما شاء الله إزيك يا سامح والله كبرت وعاوز عروسة.

- يا رب بقى ألاقي عروستي عندك.. لاحسن أنا دخت وتعبت من

كتر العرايس اللي شفتهم.

■ ■ ممنوع الضحك ■ ■

- يارب.. ها قول يا حبيبي علشان أكتب.. استنى لما أطلع القلم والنوتة.
- عاوز واحدة متفجرة الأنوثة.
- ليه بس يا بني ربنا يكفيننا شر الانفجارات.
- وعاوزها قبله كده لما تظهر في أي مكان.
- ليه بس ما تعقل يا بني والا إيه.. ماشي هاكتب أهه.. أون.. ب... له.
- وعاوزها شعرها حرير وبيهفهف كده على خدودها زي الشراة
- اللي بتطلع لما الواد سيكو الميكانيكي بيشغل مكنة اللحام.
- سهلة دي الكرياتين حلها يا سامح.. اللي بعده.
- تكون عينيها خضرة وواسعة ومدورة.
- هتחסدك يا بني بلاش مدورة دي.. هاكتب عينيها حلوة وخلص.
- طيب.. بس اكتبتي كمان إنها تكون مش قصيرة علشان تعرف
- تنصف النجف وفوق الدولا ب وكده.

■ ■ ممنوع الضحك ■ ■

- حاضر.. طويي.. يل.. ة.. زي راس.. ال.. عبد.
- وبقها صغير وبتعرف تحط روج.
- ما كلهم بيعرفوا هياكلوه يعني.. بقها ص.. غ.. ي.. ر.
- ومناخيرها رفيعة وتكون شائلة اللوز واللحمية..
- لالالا.. لازم تتنازل شوية يا بني الطلب ده كثير.
- خلاص مش مهم.. أمري لله.
- وإيه كمان.
- وعاوزها رقيقة وبتعرف تتكلم كده ومدرحة وفاهمه كل حاجة مش قفل.
- وماله.. مد.. ر.. دحة.
- بس محترمة وبريئة وما بتطلعش منها العيبة وخام.
- مدرحة وخام يا سامح!
- آه.

■ ممنوع الضحك ■■

- وفاهمه كل حاجة وبرينة يا بني!

- أيوه.

- ومتفجرة الأنوثة وبتفرقع يا حبيبي!

- أيوه يا طنط هو أنا ها اتجوز كام مرة يعني.

- كمل يا سامح.

- عاوز أحس إنني ها اتجوز ملكة جمال يعني ما احتاجش أبص

لأي بنت بعدها.. عاوزها قمر قمر قمر.. مالك يا طنط بتبصي لوداني
ومناخيرني ليه؟

- أبدا يا حبيبي بتأمل فيك وفي جمالك ووسامتك.. خلصت؟

- كفاية كده أنا قنوع وهي دي بس طلباتي.

- طيب تعليمها، ثقافتها، دماغها، إخوانتها، مش عاوز حاجة متفجرة

كده والا حاجة.

- لا مش مهم.. شكلها أهم حاجة.

■ ■ ممنوع الضحك ■ ■

- طيب إمكانياتك إيه؟

- يا ماما انا..

- مستعد تدفع كام مهر وشبكة والشقة كام أوده؟

- يا ماما اااااا.. تعالى طنط عندها أسئلة.

- آیوہ یا تھانی؟

- فين يا حبيبتي شقة ابنك اللي المحروسة متفجرة الأنوثة هتعمرها

وتتفجر فيها وإمكانياتكم في حدود كام.

- هو سامح ما قالکیش.

- لا الصراحة.. هو ما قاليش!

- عاوزین عروسة بنت ناس طيبين كده وبیشتر و راجل



الملافة سعد

في ناس لما تفضفض معاهم يعملوا كده.. وخليني أوصف لكم
أربع مواقف:

♠ (نبي أيام الامتحانات)

- الإمتحان قرب ونفسي أذاكر

- مش ها تلحق ما فيش وقت

- أهو هحاول ألقط يمكن ربنا يكرمني

- ماينفعش أصلاً كان لازم تذاكر من أول السنة.

- أنا حليت وحش في الامتحان

- شفت مش قلتلك طول عمرك فاشل

■ ■ ممنوع الضحك ■ ■

- أنا قلبي مقبوض

- يبقى هاتسقط..

- أنا خايف

- لازم طبعا تخاف مافيش أمل.

* * *

♥ "في الخلافات الزوجية"

- مراتي مدوخاني وكل شوية تغضب وتروح عند أهلها

- أنا لو منك أطلقها

- طب ليه بس أنا بحبها

- اتجوز عليها زيزي وأدبها.

- لالا... هي بس ساعات بتتغندر عليه.

- ولع لها في العباية البرتقاني.. واحرق قلبها على الطرح الفوسفوري.

- هي طيبة مش عاوز أجرحها بس المشكلة مامتها

■ ممنوع الضحك ■

- بص أول ما حماتك عينها تروح في النوم بلغ عنها وقول إنها
إرهابية.

- هي عارفة إن روحي في العيال وبتستغل كده
-اقتلهم واقهرها عليهم.

- مش قادر أعيش من غيرهم
- انتحر علشان تحسسها بالذنب.

* * *

♠ (في المرض)

- أنا رحت للدكتور

وحا أعمل عملية علشان لقي عندي (.....)

-ربنا يستر.

- مالك بتقولها كده؟

- لا مافيش بس.. ربنا يستر

■ ممنوع الضحك ■

طب قول لي هو إيه ال(.....) ده اللي ها يشيلهولي من بطني.

- بلاش تعرف أحسن.. وربنا يستر

- طب يعني ها أموت واللا إيه؟

- كلنا حانموت و ربنا يستر.

- طب أنا خايف ومرعوب وركبي بتخبط على الجيران.

- بلاش تخبط عليهم بالليل وربنا يستر.

* * *

♥ (عند سكوى الزوجة من نروجهما)

- حاسة إن جوزي متغير من نحيتي

- يبقى إتجوز عليكى فيفى الرقاصة.

- بعد الشر.. أنا اللي حاسة إنى مش زي زمان

- أصلك لظلظتي وبقيتي شبه فوزي.

- عندك حق أنا فعلا بقيت غريبة.

■ ممنوع الضحك ■

- وبقيتي كئيبة كمان وودانك قشفت ورموشك وقعت وعمودك الفقري بيرقص ماكارينا.

- بس دمي خفيف صح ؟

- مش واخدة بالي قوي.

- طب إيه رأيك ممكن أقص شعري زي ميسي مثلا أو أضربة في

الخلاط زي شيكابالا

- الخلاط اتحرق.

♥ طب هاعمل ريجيم نزي بتوع الرابع الأكبر

- ولا رابع ولا فالح طول عمرك طخينة يا أمينة.

- طب هاشتري لبس جديد.

- مش لما تخسي الأول!

- طب هاحاول أجدد حياتي وألبس له جيبة بكرانيش

- وتجديها ليه مش لما تعرفي الأول هو اتجوز عليك واللا لأ.

■ ■ ممنوع الضحك ■ ■

- طب هو برده طيب وابن حلال
- متهيأ لك ده بياكل الفول بالمعلقة.
- ده احنا لنا ذكريات حلوة مع بعض
- بأمارة ما زعلك من سبع سنين كده وقال لك يا فاشلة لما البامية اتحرقت.
- أنت بتفكريني ليه؟
- علشان تفوقي أنت لازم تسيبي البيت وتطلبي الطلاق ده مش حاسس بيك.
- "يا طيبين الناس دي بتبقى عاوزه بس حد يسمعها
- كلام وبس
- وبيكملوا حياتهم تاني وهم فرحانين، اسمعوهم وقولوا كلمة حلوة."



21

عروسة المولد

من أول ما تتولد

-مبروك يا أستاذ كمال اللي جاب لك يخلي لك وعقبال ما تشوفها

عروسة

- كلي يا حبيبتي علشان تكبري وتلظلي وتبقي عروسة

- حبيبة تيته تعالي هاحكي لك حدوتة

ومش بتكون حلوة وملتوتة إلا لما يتجوزوا ويعيشوا في تبات

ونبات ويخلفوا صبيان وبنات.

وتبدأ البنات تكبر وترسم

(عروسة المولد)

وتشتري (عروسة) باربي وتلبسها وتقلعها وتسرح لها وتلون خدودها

بالألوان الفلوماستر

■ ■ ممنوع الضحك ■ ■

وتخلع دراعاتها وتكسر دماغها، وبعدها تتفرج على فساتين الزفاف
والدبلة والطرحة وصور المخطوبين وتحلم.

واتبرمجي يا عنايات على كده، شغلتك في الحياة تبقي عروسة.
اللبس والتفكير علشان كده والحلم في حدوتة واحدة بس.....
واحدة بس

مفيش أي طموح ثاني!

يا بنوتة

ما تخليش حلمك في الحياة عريس وبس، خليك إنت حلم كل
الناس بتتمنى إنها تحققه.

انجحي واعلمي إنجازات ومفاجآت، خلي الناس تعرف إنك موجودة
وخليكي شيء مميز، وقتها حتى لو العريس اتأخر مش هاتحسي بوجع
ولا بفراغ؛ لأنك مش هاتكوني فاضية؛ لأن في فرحة ثانية وحلم ثاني
ونجاح لسه بيكمل في حته ثانية.

وقلبك عمران، مش هايدق على الفاضي.



22

وجع

كانت قاعدة جنب جوزها في البلونة وشايله بنتها القمر اللي
شبهها، سرحت شوية واكتشفت إنه بييص لواحدة!

- عجبك؟

- ممم.. بصراحة؟

- أيوه بصراحة.

- جميلة قوي.

- نفسك فيها؟

- بصراحة.. قوي.

- إيه اللي عجبك فيها أصلاً!

- عامله كده زي القشطة.

■ ■ ممنوع الضحك ■ ■

- طيب وإيه اللي مآخرك؟
- مش جاهز ماديا.. الموضوع موضوع فلوس بس.
- يا سلام! ومالك متأثر كده.
- خايف واحد غيري يخطفها مني.
- بنتها عيطت.. قامت وطبطبت عليها ونيمتها وغطتها ورجعت له..
- ووقفت وحطت إيدها في وسطها وقالت:
- لو معاك فلوس..
- من غير ما تكلمي مش هاستنى لحظة، كفاية اللي أنا فيه.. واللي
- شفته من يوم ما اتجوزنا
- دمعت شوية وبلعت ريقها وتماسكت وبصت له بثبات، وقالت:
- ارضى باللي معاك واشكر ربنا.
- هو أنا اشتكيت ما أنا صابر أهه!!
- ربنا يرزقك الأحسن
- أصلا ما فيش أحلى منها.

■ ممنوع الضحك ■

- ليه يعني!

- ولا أحلى ولا أنصف ولا أروع ولا..

- كفاية.. كفاية.

ودخلت وغابت شوية ورجعت بشبكتها وحطتها بين إيديه!!

- خد بيع شبكتي وخذ الفلوس.

- للدرجة دي!

- أيوه أنا بحبك أكثر من أي حاجة في الدنيا مش مهم الذهب ولا

الفلوس ولا أنا المهم تكون مبسوط وتحقق اللي نفسك فيه.

- تسلمي يا حبيبتي.. بس بأقول استنى شوية يمكن ألاقى عربية

تانية موديلها أشيك من دي واللا إيه.

- وماله يا حبيبي.

- طب شيلي الشبكة وهاتي شاي.

- حاضر



23

أهلاً أهلاً بالزوار

عارفين لما جرس الباب يرن والولاد تجري وهي فرحانة وتقول
هياييه علشان في ضيف جاي..

في ضيوف تفرح، جميلة كده ومبهجة ومبتسمة وخفيفة وظريفة
وبتيجي معاها الفرحة وترتاح لما تشوفها وتتكلم معاها.

وفي ضيوف كئيبة، تيجي وتمشي تزود همك وقلبك يتقبض وأول
ما يمشوا تقول.. الحمد لله.

على فكرة، في حاجات ما بناخدش بالنا منها:

حاول تتصل قبل الزيارة وتستأذن علشان يستعدوا-كلنا بنحب
يبقى شكلنا حلو قدام الضيوف-وأكد عليهم لو الوقت مش مناسب
يبقى بلاش.

■ ممنوع الضحك ■

(بدل ما تروح تخنقهم ولا أنت تنبسط ولا هم يفرحوا بيك)
البس حلو وخلي شكلك حلو واضحك، لو في أطفال في البيت
فرحيهم ولو بيونبوناية حايجبوكي قوي.
(وهاتي لمامتهم شوكلاتة دي غلبانة برده)
لو رايح لزميلك ما تقفش في وش الباب علشان لو أخته الحلوة
فتحت ما تجرحش البيت.
(ولو مامته ما تدخلش رقبتك الطويلة وتقول فين محمد يا طنط
وتبحلق يمين وشمال)
بلاش تبقى زي المغص والصداع النصفي تكبس على نفس الناس وتقعّد
سبع ساعات وتشتكي من كل حاجة وتكرههم في الدنيا وأنت مكشر وقرفان.
بلاش تطب على الناس فجأة وهم مش محضرين أنفسهم.
(الغسيل في الصالة، الراجل ضارب مراته وعينها واردة، بنتهم جاي
لها عريس ومستشورة)
لما حد يقدم لك حاجة ما تتقرفش وتكرمش مناخيرك وكل واشرب
جبر خواطر.

(كتر خيرهم وبعدين ماله السحلب ما هو زي الفل)

ما تقعدش في كرسي كاشف البيت اختار مكان مستور علشان
البيوت عورة وأنت كمان يا حبيبتى بطلي تبصي هنا وهناك.

لما تروح تزور حد مريض خليك خفيف وقصر، دقايق وسيبه يرتاح،
وما تاخذش معاك ابنك اللي بيحب يفتش في الادراج وييموت في شرب
الببسي، وتقعد تحكي له إزاي خطبت زيزي، هو بيكون تعبان ونفسه
ينام، وخصوصًا لو عامل عملية.

ما تروحيش لجارتك وترغي معاها الصبح وتحكي لها قصّة حياتك وهي
لسه ما طبختش ولا سرحت شعرها وجوزها يدخل وهي ناسية وقاعدة
تتكلم مع حضرتك فيتخض من منظرها وتجيله جلطة، سيبها تطبخ.
لو الشخصية اللي بتزورها بيتهم فيه ابتلاء بلاش نظام.. يا عيني يا
ختي يا ضنايا

الله يكون في عونك، حملك كبير، معلش.

(مش ناقصاك ما تزوريهاش أحسن)

لو في امتحانات عند الولاد إلغي الزيارة؛ لأن أهمهم في الوقت ده

■ ■ ممنوع الضحك ■ ■

تجوز عليها الصدقة، ويا ريت جوزك يخرج مع جوزها اليومين دول؛ لأنه
في خطر والجيران لبعضيههم.

في ناس مش بتحب حد يدخل بيتها بالجزم وبيتأذوا جدا جدا بلاش
تضايقوهم واقلعوها لما تدخلوا جنب الباب.

(وخصوصا لو الدنيا بتمطر وبتحبوا تلعبوا في المية)

لو ولادك بيلعبوا مع ولاد الناس اللي بتزوروهم لازم قبل ما تمشي
تخليهم يلماو اللعب ويرتبوا المكان، علشان هاتدعي عليك وهي بتلمهم
لعبة لعبة.

مش لازم تعلقي على كل حاجة في البيت.....

هي الكنبه دي مش كانت هناك، إنت نقلتي السرير هنا ليه؟

وجبتي السجادة دي إمتى؟ وبكام؟

إنت رايحة تزوريها مش تحققي معاها.

بلاش تقوليها الكلام اللي يجرح..

مالك خاسة ووشك أصفر كده!

إنت طخنتي كده ليه!

مالك متبهدة كده!

ما هي كانت بتطبخ من إمبراح، طبعي تبقى فظيعة..

وإنت كمان يا فظيعة.. عارفة إنك زهقتي منها لأن الزيارة طولت

بس ما فيش داعي تصرخي كثير، وتلطشي في العيال، وتشدي شعر

بنتك، وتهبشي ابنك كل ما يعدي؛ علشان الضيف بيتكسف ويبقي

حاسس إنه السبب.

(تعبانة ما تعزميش حد)

أحلى حاجة الستات تقعد مع بعض في مكان، والرجالة في مكان

تاني؛ علشان كله ياخذ راحته، ولما تضحكي مع صاحباتك زميل جوزك

وجارك ما يسمعوش ضحكك ويتسرعوا.

لو إنت المعزومة كلي.. كلي حتى لو الأكل محروق، حرام عليك يا مفترية،

دي طول النهار واقفة على رجليها ونكدت على جوزها علشان العزومة وسينها،

■ ■ ممنوع الضحك ■ ■

وما تعمليش رقيقة ومش قادرة ومعدتشي مليانة، عارفينك وفأسينك.

وأخيرًا

خدوا نية لأننا بننساها

(عيادة مريض، إدخال سرور على مسلم، حب في الله)

بنت ناس

بنت ناس

أصلها أرسقراطية ضحكتها شيك وبتحط إيديها على بقها.

(مش كرررر هقهقهق ولوزها بتترعش)

مش بتتكلم وهي بتأكل وبتمضغ وهي قافلة بقها، بتأكل البيتزا

بالشوكة والسكينة.

(مش بتضربها مثلثات زي ناس)

لسانها معووج وبتنطق الحروف برقة، بتقول مش رحت.. مش

أكلت.. مش عرفت.. بتقول ميرسي

(مش متشكرين يا عم الحج)

■ ■ ممنوع الضحك ■ ■

باااي

(مش سلامو عليكو)

وبتقول زي ما بأقول لحضرتك يا تااوونت

(مش زي مبؤلك كده يا طاانط)

بتقعد على طراطيف الكرسي وبتسلم بضوافرها، مش بتعرف يعني

إيه ثقلية وفتة وبراييم ويااي بقى.

بتفطر كورن فليكس

(مش سندوتشات الفول)

مش بتأكل رنجة وفسیخ.

(فاتها نص عمرها)

عمرها ما نضفت ولا سمك ولا فراخ.

(في دي يا بختها)

كل شنطها من عند

Abo Nesma

(ماركة وكده)

والشوزات من عند

Happy gazma

(دي جزم فرحانة وبتمشي لوحدها)

جدها أصله تركي وجدتها جبنة تركي، خال مامتها عنده فيلا على

ترعة المحمودية.

(وفي معدية.. أأأأ.. قصدي لانش)

دي مواصفات بنات الناس حسب تقييم الناس.

على فكرة

المحجبة المحترمة المتربية اللي بتمشي زي الملاك وما تحسش

بيها برده بنت ناس.

واللي بتغض بصرها مش علشانك.. علشان ربنا.. برده بنت ناس.

■ ■ ممنوع الضحك ■ ■

واللي بتغير طريقها وتمشي من طريق أطول علشان ما تعديش
على قهوة.. برده بنت ناس.

واللي ساكنة في بيت بسيط ولبسها بسيط وما تعرفش ماركات..
برده بنت ناس.

واللي بتأكل فول وطعمية وشاطرة في التقلية بنت ناس.

واللي بتتکعبل في عبايتها علشان طويلة وجزمتها كوتشي.. برده
بنت ناس.

واللي ما بتعرفش فرنساوي وبتقول شكرا ومتشكرين.. برده بنت
ناس.

وسلامو عليكمو.



25

مشية الستات

للسات أكثر من مشية، عارفينهم؟

♥ مشية البطء المرحمة

ودي لما الست من دول بتلبس كعب عالي وهي هلامية حبتين
وغالبا الجيبة أو الفستان بحزام فيه سلاسل وفيونكات وبتحصل زلازل
وبراكين واهتزازات زي عروض فرقة الفنون الشعبية كده.

وألف مبروك

مشية العسكري

دي بنوتة طيبة بس هي خجولة جدا هاتلاقوها مندفعة ومايشة
بسرعة وحاضنة الكتب ولابسة كوتشي وما بترجعش لورا

■ ممنوع الضحك ■

ومخضوضة وبتبرق وبتبص حوالها كثير زي المدمنين ودي غالبا
بتقع وبتكعبل في رباط الجزمة
وعندها إصابات كثير.

وألف سلامة

♥ مشية البجعة

ودي أعراضها بتظهر لما البنث بتلبس جزمة الباليرينا الفلات دي
بتاعة البالية ووقتها بتكون مقتنعة إنها بجعة من اللي بيغرقوا في
بحيرة البجع ما تقلقوش وسيبوها تعدي الشارع حتى لو على طرايف
صوابعها ولما توصل سق فولها.

وربنا يهدي

♥ مشية البرنسية

ودي سايحة.. أأأ.. قصدي عندها إحساس إنها من السياح وبتتفرج
على الناس في الشارع كأنهم تحف وآثار فرعونية وبتشيل شنطة إيديها
قصيرة وتعلقها في ذراعها، وبتلبس كعب عالي جدا ونضارة شمس

■ ممنوع الضحك ■

وعقد كبير أد كده على صدرها وبتعقد الطرحة زي ماجدة في الأفلام
بتاعة زمان

وربنا يشفي

❖ سية بنت الدايزة

مش عارفة ليه بيقولوا على الست الوالدة كده رغم إن هي اللي
دايزة مش مامتها

ودي أصلاً سرحانة وبتمشي على مهلها في خطوط لولبية غير
مستقيمة ورجليها بتلف على بعضها وبتتفرج على كل الفتارين
والمحلات وفي الآخر مش بتشتري حاجة.

وربنا على الظالم والمفتري

❖ سية المثلث

ودي ثنائية غالباً بيكونوا أختين

أو بنتين أصحاب أوي

هاتلاقيهم ماشيين لازقين راسهم في بعض ودي راس المثلث

■ ممنوع الضحك ■

وجيبتهم أو العبايات نازلة على واسع ودي قاعدة المثلث
والأقصر منهم متشعلقة في دراع الطويلة وكل شوية يتوشوشوا
ويضحكوا

ولو لابسين كعب عالي بيعملوا دوشة
ولو لابسين فلات.. الطويلة منهم بتتكعبل في القصيرة وبيقعوا سوا
اعترفي وقولي إنتِ بتمشي إزاي.



الشاويش عطية

على فكرة مش شاويش ولا عطية ولا غفير.. إنها جميلة وبنوتة..
وما بينكدش على البنات إلا الكلمتين دول.
البسي يا حبيبتي كده وأنت خارجة وحطي في وشك حاجة،
طول ما أنت عاملة كدة ماحدش هايبصلك،
ومش ها تتجوزي، وقصري الطرحة دي.
ولو البنت فتحت بقها وقالت كلمة،
يقولوا لها... خليكى قاعدة وخلي الحجاب ينفعك!
كل الشباب والرجالة ما ييجبوش المقفلة.. يا مقفلة.
والمشكلة إن في شباب بيسمع وبيعهم وخلاص، ويبقى محترم
ويقول لك أنا عاوز عروسة فاهمة، بلاش المقفلة قوي دي.

■ ■ ممنوع الضحك ■ ■

لا هي مش مقفلة، إنتوا اللي مش فاهمينها!
مش معنى إنها بتخرج بالحجاب أو النقاب قدام الشباب الغرب
تبقى غفير.

مش مخبية جوز فراخ تحت العباية على فكرة ومفيش أرايب!
مش معنى إن طرحتها طويلة ومش بتحط ماكياج ولا بسه جوائتي
تبقى شاويش.

مش معنى إن طرحتها عادية ولبسها بسيط تبقى ما عندهاش أنوثة.
مش معنى إنها جدعة وبتعتمد على نفسها تبقى راجل.
مش معنى إنها واثقة في نفسها تبقى غفير.
لو شديت ودنها حاتسقف زي البنات الجمال اللي ماشيين في
الشارع.

ولو خبطتها على مناخيرها هاتغني، ولو كعبلتها هاتحط مونوكير،
ولو شديتها من خدودها هاتضحك، ولو شافت الروج ها تأكله... أأأ..
قصدي عارفه إنه بيتحط على الشفايف!.

وعندها جيبة والله، وفستان بكرانيش، وبتسرح شعرها كل سنة مرة

■ ■ ممنوع الضحك ■ ■

الحمد لله بعد ما تستحمى في العيد الكبير.

عارفة الفرق بين البارفان والجلانس، وعارفة إن البيروسول مش
مزيل عرق.

عارفة المودة.. أو الموضة

بتحب اللون البيّنك

(كل البنات بتحبه مش عارفة ليه)

بتحب القطط والدباديب

(وبتشترى ماديّيات وسلاسل وعقود كثير)

بترسم ورد وهي بتذاكر وخطها منيل،

بتقرأ شعر،

(هي مش فاهماه بس بتحاول)

إيديها أصغر من إيديك ورقيقة، زيها زي البنات الروشين ويمكن

أحلى كمان،

بترقص مع البنات صاحباتها، وبتسقف وتغني بس لما بيكونوا في البيت.

■ ممنوع الضحك ■

نفسها تعيش، هي بس عارفة إن نظرة رضا من ربنا أحسن من
مليون نظرة إعجاب من الشباب اللي في الشارع.
ساترة نفسها ومحافظة على الأمانة ويوم ما تكون زوجة هاينزل
القمر، ويغسل المواعين وينور في البيت.
مش لازم تلبس بنطلون وتعمل لنا انبهار في الشارع.
مش لازم وهي خارجة تطلع نص شعرها من الطرحة، وترسم عينيها
زي كيلوباترا علشان تبقى بنوتة.
مش لازم تلبس إكسسوار كإن حنطور ماشي في الشارع علشان
تلفت نظرك.

هي ممكن تمشي وما تحسش بيها؛ لأنها مستورة،
والله بنوتة،
بلاش تظلموها



27

غلطة

أحيانا لما بتيجي تدور على نصك الثاني بتحتار شوية، ساعات بتسأل وتعرف عنه غلطة، تقوم تتعقد من كل البنات أو كل الشباب.
♥ غلطة!

في ناس بتغلط بس ما نقدرش نعمم الغلط علشان إنسان واحد (ملتزم ظاهريًا) غلط غلطة، وبيأكل والعياذ بالله ترمس في الشارع!، ويشرب استغفر الله العظيم يارب فانتا بالتفاح!، أو أخت محجة أو منتقبة استغفر الله العظيم بتأكل جيلي كولا.....
يبقى كل الملتزمين كده.

لأ، طبعًا.

على فكرة بقى، مفيش عريس متدين 100% لدرجة إنه بيطلع نور من ودانه.

■ ■ ممنوع الضحك ■ ■

ومفيش عروسة متدينة لدرجة إن مناخيرها بتنور،

(بغض النظر عن إن دماغها بينور بالطرحة الفسفوري..)

ومش كل شاب بدقن يبقى ملاك من السما..

مممكن يكون بوشين واحد بدقن والثاني لأ،

بس في منهم فعلا ناس زي سيدنا يوسف وزى الفل.

ومش كل اللي لابسة نقاب أو طرحة طويلة ملاك،

مممكن تكون شريرة وبتغتَاب الناس.

(وفي منهم بنات عسل زي بنات شعيب كده وزى القمر، وفي ناس

مش متدينة بس بتحبهم)

التدين مش بيبان قوي ومالوش لون ولا ريحة، التدين مش بيتقاس

بالمتر ولا بالكيلو.

الإيمان إحساس جواه

ها تشوفيه إزاي؟ وهو لابس القميص الكاروهات الأخضر وقافل

زراير الجاكييت البني وفارق شعره من النص!

■ ■ ممنوع الضحك ■ ■

الخشوع جواها، ها تتفرج عليه إزاي من ورا الحجاب!

يبقى لازم نعرف كده من الأول، مفيش حد مثالي،

الغلط مش عام.

إنتِ مش ملاك، وكمان هو مش ملاك، وماحدث بيطير بجناحات

وقت السحر. الخشوع جواكم.

كل واحد فينا جواه خير، ونفسه ربنا يحبه.

في أساسيات دي اللي ندور عليها..

(طول شعرها مثلا ومناخيرها صفرة وشعرها أخضر)

(وهو فلوسه ومرتبته.. كده يعني)

يووووه... أأأ.. قصدي.. الأساسيات

الحوار مهم مرة واثنين، والخطوبة أصلا علشان كده.

أحسن حاجة لما تروح تخطب ولما يجيلك عريس تبقى طبعي

تتكلم بصراحة وبوضوح، وتسال سؤال بريء، وتشوف رد فعل اللي قدامك.

مش عارف تتكلم قول له أنا مش محضر كلام لو حابب تسألني عن

أي حاجة.

وكل ما يسألك أو تسألك تجاوب وتقول طيب وأنت؟، وتقلب السؤال عليه.

سمعة الإنسان بتفضحه وتسبقه لو كان صالح بيتعرف رغم أنه،

ها يشوفوه في المسجد،

وعمره ما عاكس يارا،

وصحابه عارفين إنه مش بيتفرج على تفيدة وهي بترقص،

ولو كان خبيث ها تلاقي الناس كاشفاه، مثلاً.. شافوه وهو بيقزقز

لب في البلكونة،

وكمان شافوه أكثر من مرة وهو بيضرب سندوتشات الطعمية

ومخلص فلوسه عليها، وآثار الإدمان باينة على خدوده ووشه.

لازم تسألوا عليه، ما ترفضيهاوش علشان مش ملتحي رغم إنه حافظ

نصف القرآن ومصلي وبار بوالديه.

وما ترفضهاش علشان طرحتها عادية، رغم إنها لابسة عباية واسعة

وبنغطس وندور في كم العباية علشان نسلم عليها،

■ ممنوع الضحك ■

الأخلاق مهمة قوي،

الدين كله خلق.. فمن فاقك في الخلق فاقك في الدين.



28

نوع نادر جدًا

في نوع نادر من البنات يبقى عندها إحساس إن أهل العريس
فلاحين ومش مودرن، وإن أهلها من طبقة أرقى، وبتبقى هي وأخواتها
البنات أو صاحباتها عاملين كده:

- شفتي بيقولوا على البارفيوم بارفان.. ههههه

(إنتوا الاتنين غلط أصلا اسمها كولونيا)

- إلحقوا دول جايين جاتوه. مش المفروض بومبونيرة فضة وفيها

شوكولااا

وتزعل قوي لو خطيبها مش عارف البانتاكور.. والشيميز.. والتونيك.. وال

. *&&/@\$# .

وتبص له شذرا لو قال شكرا يا طنط

(أصلها بتقول لمامته ميرسي يا تواءنت)

■ ممنوع الضحك ■

وتتكد عليه لو ما جابش لمامتھا فآزة كروآزينة في يوم الأم

(وممكن تقتله لو جابلھا شال صوف)

وتقعد تنتقده وتقول له قول كده وما تقولش كده وهات دي كده

وماتعملش مناخيرك كده واشرب كده.

ولو حماتها سألتھا تحبي تأكلي إيه يا ضنايا أعملهولك على الغدا،

تطلب بيكاتا بالشاميينون وساليزون وباستا، وهي مش عارفة اللازانيا

دي مرهم واللا شتيمة،

ولما تزورهم بتعيش في دور الأميرة وأخواتها الأقزام السبعة، أو

بنت السلطان اللي جاية من مملكة الكرانيش، وبتمشي على طراطيف

صوابعها جوه الجزمة

وبتشرب المية بالشوكة والسكينة.

يابنات، ما تصعبوهاش كده وخليها سهلة.

دول ناس طيبين، وأهله دول هم اللي ربوه وكبروه لحد ما جه

وخطبك وعجبك.

المجد للبنات اللي مش بيعملوا كده

نصائح لام العريس

ابنك رايح يخطب ألف مبروك...

دي شوية نصايح من واقع كلام البنات والستات، والصراحة هم
أواريب وبيأخدوا بالهم من حاجات عجيبة.

شوفي... قلولي لابنك ما يفرقش شعره من النص.

لو هو متابع مسلسل فاطمة وكريم ومنك لله يا ظالمة، إنتِ السبب
ليه قلتيله إن شعره ناعم..

(البنات بتحب العريس اللي مظهره فيه رجولة بلاش الشعر المسبب
وبلاش يستشور)

ركزي على الشراب، لو لقيتي الفردتين مش لون واحد، يبقى ابنك

■ ممنوع الضحك ■

عنده عمى ألوان هاتيله فردتين لون بعض..

البنات بتبص للشراب ولازم يكون لايق على البنطلون والقميص.

(الشياكة مهمة)

لو لابس حفاظة وحاطط جل في شعره وفاكر نفسه أحمد حلمي

في الفيلم..

بلاش تكسفي نفسك واهربي.

(استني عليه سنتين لحد ما يعقل الأول)

قوليله لما يقدموله كيك أو جاتوه ما يأكلهمش كلهم، وابقى هاتيله

وانتوا مروحين..

(البنات بتستنى اللحظة دي وها تتفرج عليه وها تحكي لصاحباتها

في التلفون.. أواريب أواريب)

خليه ما يتفسحش بعنيه في الصالون والستارة والبراويز والسجاجيد

وهو بيكلمها.. عيب.. عيب.

(وبطلي إنتِ كمان)

■ ممنوع الضحك ■

واستنوا لما يقوموا يجيبوا العصير واتفرجوا بسرعة.

لازم يقص ضوافره؛ لأنهم بياخدوا بالهم منها، ولازم يكون نضيف

وظريف ولطيف، ويحط بارفان ويلمع الجزمة.

(بلاش الكوتشي وبلاش الصنادل)

(ولو لبس شبشب بصباع مش ها توافق)

خدوا في إيديكم حاجة، كيس جوافة سبت برتقان.. كيلو شوكلاته

أو تورتاية.

(لو ما جبتيش ها تقول عليه بخيل وها تمسكهاله وتذله بيها طول

عمرهم)

مش لازم بدلة وكرفته هي مش ناقصة خنقة خليه يلبس قميص، ويا

ريت يكون مكوي، وبلاش النضارة الشمس، إنتوا أصلاً رايعين بالليل.

مش طول ما انتِ قاعدة تشكري فيه، كده كده مش ها يصدقوكي

علشان إنتِ مامته ما تتعبيش نفسك.

(ووفري صحتك واشربي العصير وأنتِ ساكنة)

■ ممنوع الضحك ■

لو أخذتوا معاد ما تلغيهوش، ولا تأجليه لأن بيكون فيه طواريء
في البيت، والبنت بتبقى قاعدة بالهدوم من قبلها بتلت أيام، والجزمة
بكعب عالي وضيقة، ها يدعوا عليكي وعليه.

(اتصلي بالتليفون قبلها واستأذني بذوق)

بلاش تقوليلهم إنه كان بينادي على سوبر مان من الشباك وهو
صغير، وما تحكيش على اليوم اللي تاه فيه في البحر.

(هي كمان بتأكل المشابك وتاهت في حديقة الحيوانات، ولقوها
جنب الزرافة مش كل الذكريات تتحكي لأنه بيتخرج وكلنا بنغلط)

ماتلبسبش كل الذهب اللي عندك وتستلفي غوايش أختك؛ لأن لو
طلبوا حاجة بعد كده وقولتوا الظروف ما تسمحش هايفكروك بالغوايش،
وهي أصلا مش بتاعتك

(ما تتصنعوش وخليكوا على طبيعتكم والصراحة في الماديات
أحسن علشان تبقى عارفة البير وغطاه).

ماتاخدش معاك حفيدتك بنت بنتك وأول أحفادك.. علشان البنات

فاقسين الموضوع ده

■ ممنوع الضحك ■

(ها تشرب البيبسي وقال إيه عاوزه أعمل بيبي يا تيته وأنت ها
تقولي أصل ما بتدخلش الحمام مع حد غريب، وهاتقومي وتتفرجي
على الشقة.. فاهمينك يا أروبة)
لو قابلوكم كويس والبنت وأنت ماشية خدتك بالحضن، وباستك من
هنا ومن هناك يبقى دي علامة يا مارد، وفي قبول.
ألف مبروك.



لظلوطة الملاحظة

خليك كده.. طول النهار فى المطبخ ما بتفكرش غير فى الأكل
وبس، من صينية البطاطس باللحمة الضاني لطاجن الرز المعمر، ويا
جماله يا حركاته يا تكاته.

واللا البيتشيفور اللي بتعمليه، كفاية فرجة على قناة الطبخ،
وبطلي تدعي وانتي ساجدة للشيف فلان، مش هو اللي ها ينقذ حياتك
على فكرة.

ما تتصلش بيه فى رمضان وتقولي له:

(بحبك فى الله يا شيف)

مش لازم تحكي لجوزك الفرخة بتتنضف إزاي..

بلاش تقشري البطاطس وتقمعي البامية وانتوا بتتفرجوا على

التليفزيون، اعملي كل حاجة الصبح وهو في الشغل يا لظلف.
هو مش عاوز يعرف أم محمد جارتكم بتعمل القلقاس بسلق واللا
بالكزبرة الخضرة، حاولي تبصي في المراية قبل ما تجيبي المسلسل
التركي وهو قاعد، وخدي بالك من المذيعات لو لقتها حلوة خدي
الريموت وغيري، وقولي زهقنا من السياسة، بلاش أول ما يدخل الشقة
تروحي رازعاه معلقة مربى.

علشان سُكرِك يا حبيبي... خلاص كره المربى.
صحيح لازم يكون طبيخك حلو بس مش طبيخك بس اللي يبقى حلو.
ما تسألِيهوش كل يوم السؤال اللي مدوخ كل الستات.. أطبخ إيه
بكره؟! إنتِ صاحبة القرار ويا خوفي من قراراتك، بطلي تسيطرِي على
تفكيره بحلة المحشي.

(كل يا خويا بالهنا والشفأ أنتِ تشيعيبت طول النهار)
اتعلمي تتكلمي وتقولي رأيك وتثبتي شخصيتك، ما تشوشيش
أفكاره بطبق الفتة وتهيمني على نظراته بحتة الكنافة، وبعدين تسألِيه
ببراءة وإنتِ بتقلبي كوباية الشاي..

■ ممنوع الضحك ■

(مالك ساكت كده يا خويا مش بتكلمني ليه)

هو بيكون سامعك كويس بس الأكل كابس على نفسه، حا يزهدق
يا لظلظ،

وحا يكرهك يا حبيبتي، وممكن نفسه تهفه على طبيخ واحدة ثانية،
نفسه في شوية رومانسية، وأنت غرقانة في التقلية.
حاولي تقري كتاب وتثقف في شوية واتفرجي على برامج اجتماعية،
الدنيا مش مطبخ وأكل وبس..
وعلشان خاطري،

ما تتصليش بالشيف اللي بيطلع في التلفزيون



31

لما يجيلك عريس

يا بنوته.. لما يجي لك عريس.. ما تستخبش ورا المكياج خليه
يشوفك على حقيقتك ويتصدم..

أااا.. قصدي يعجب بطبيعتك، وما تلونيش خدودك وما تلبسش
حلق، انتِ كده بطبيعتك من أجمل ما خلق.

البسي فستان أو عباية.. الشاب الغلبان من دول بيتخيلك في أحلامه
بفستان طويل بمبي وديله واسع وزى الأميرة مش بنطلون بركب.

(البنطلون اللي بركب مافيهوش ريحة الأنوثة وبعدين ما ينفعش
أصلاً مع الحجاب)

بلاش كعب عالي قوي لاحسن تتكعبي وأنت شايلة صينية العصير

■ ■ ممنوع الضحك ■ ■

ويقع على دماغه ها يمشي، خليكى على طبيعتك وبلاش تتصنعي الرقة
في الكلام.

بلاش إنت (كررت) تعمل إيه اسمها (قررت)..

وبلاش (الاستكرار) اسمه (الاستقرار)

علشان ها يتصدم لما تتكلموا عن (الواقع) قصدي (الواقع)

اتكلمي بالراحة وبهدوء ما حدش بيجري وراكي، الضحك بحساب

وما تخبيش سنانك وبؤك كل ما تضحكي.

(إنتِ جميلة ولو مش عاجبه مع السلامة)

لما تكلمي مامتك قدامه ما تبرقيلهاش وتكزي على سنانك.

(ها ياخذ باله ويخاف ويهرب)

حاولي تسمعي له.

(إديله فرصة يقول كلمتين على بعض منك لله يا رغبة يا مفترية)

لما تقدمي له حاجة ما تراقبيهبوش، سيبه يأكل وما تركزيش وهو

■ ممنوع الضحك ■

بيبلع.. لأحسن يزور ويموت.. عيب.

لو حضرتي درسين فقه ودرسین تجويد ما تعقديهوش وتطلعي

عينه.. مش وقته

ما تحسسيهوش إنك المفتش كرومبو.

هو مش جاي تحققي معاه.. خليكي ذكية في الحوار، مش مهم

تعرفي كل حاجة من أول زيارة، خلي بابا يسأل عنه.

لو عريس حلو ومتدين وممتاز ما تتغريش بالمظهر، ودوري على عيب

فيه تذليه بيه مستقبلاً.. أأا.. قصدي مفيش حد كامل.. يوووه بقى قصدي ما

تنهريش قوي ويغمن عليكى وتنشكحي، فيبان عليكى فيكرهك وتطفشيه.

(اتقلي أنت كمان زي الفل.. خليكي منضبطة)

ما تبقيش مغرورة وتتكلمي من طراطيف مناخيرك وتتكبري عليه،

لو هو بسيط

بلاش تتعاركي مع أخوك حماده قدامه، استني لما يمشي، واعجنيه

مع أختك الثانية

■ ممنوع الضحك ■

لو لابس حفاظة وشعره سبايكي ما تكمليش، قومي اغسلي المواعين وروحي نامي، لو اسمه حنفي أو عباس أو من عيلة أبو سحلول ما ترفضيهاوش من قبل ما ييجي، ممكن يكون أحسن من اللي بتحلمي بيه. ما ترفضيش شاب طخين أو أصلع أو بشنب أو أسمر أو صباع رجله الصغير معووج أو خرمين مناخيره مش قد بعض علشان السبب ده بس... لازم تقعدي وتكلمي معاه لأنه بني آدم يمكن يكون في قبول ويكون الإنسان اللي يسعدك رغم أنفه.. قصدي أنفك.

ما ترفضيش شاب محترم ومتدين علشان ما عندوش شقة خمس أوض وصالتين وحمام دورين، أصلا كفاية الحمام الدورين. مش لازم عربية..

(ممكن يكون عنده عربية وما عندوش أخلاق.. تختاري إيه؟)

مش لازم تعملوا الفرع في فندق خمس نجوم..

(الناس ما بيعجبهاش مهما عملتي وها يقعدوا يعايبوا على فستانك..

ماله بيت بابا وماله السطوح ده حتى طراوة).

■ ممنوع الضحك ■

مش لازم تعملي زي حسنية بنت عمك بالطبط، كل واحد وله ظروفه وجواباته واختياراته.

مفيش فارس أحلام حقيقي زي اللي في خيالك، وما عندوش قصر، ومفيش حصان أبيض، ومفيش مملكة، وغالبًا ما بيحفظوش شعر.. وما عندوش سيف ومش بيحارب..

والله ما هايخطفك

آه والله آه والله آه والله.



ست العرايس

مش لازم تشتري مية وخمسين فوطة وش

وأربعين طقم سرير

وعشر كوفيرتات

وعشر بطاطين

وست لحفة فايبر

أصلا مش هاتستخدمي غير اتنين ثلاثة.

مش لازم 24 كباية شاي شكل بعض

و24 كباية مية شبه بعض

والكاسات اللي بترقص في الضوء لوحدها

■ ممنوع الضحك ■■

والكبايات أم حرف ذهبي

والكبايات اللي بقها معوج

والصينية أم رجلين

وحامل الكنكة!

وغطاء الطشطشة!

ومش لازم طقم الشربات اللي مالوش لازمة وأصلًا ما حدش بيعمل شربات.

مش لازم جميع مقاسات الحلل الألومنيوم والتيفال والطاسات والصواني اختاري اللي حا تستخدميه بس أنت مش مهاجرة ومسافرة موزمبيق لما تحتاجي ثاني إبقى اشترى.

مش لازم حلل بايريكس وفيزون وسيراميك و @&^\$#

مش لازم الشمعدانين والساعة اللي بيتخطوا على النيش من أول الجواز هاتوهم حين ميسرة.

ساعة الحيط اللي بتعمل دينج دونج مش ضرورية عرفوا أصحابكم

■ ممنوع الضحك ■

وقرايكم محتاجين إيه وهم يجيبوها هدية.

عادي لو إتجوزتوا من غير ما تجيبوا الكاسيت الديجيتال أو
أبوسماعات كبيرة والميكرويف.

مش لازم غرفة الأطفال من البداية وممكن تسيبوا غرفة فاضية
وتقفلوا بابها إيه يعني ولو الضيوف سألوا قولوا لهم دي أوضة الفيران.
ما تروحيش مع مامتك لبتاع البلاستيكات لأنه هايبيع لكم كل
المحل والحاجات مغرية.. هاتي الضروري ورتبي أولوياتك.

مش لازم طقم الصيني

(الأساسي)

والأركوبال

(الاحتياطي)

و الطقم الفاميه

(للمعارف)

■ ممنوع الضحك ■

والميلامين

(للاستخدام اليومي)

ركزي على الصيني وحاجات بسيطة للاستعمال اليومي.

مش لازم تشتري طن مكياج و4 كيلو بارفان وكرتونة إكسسوارات

وجردل مونوكير إرحمي بابا وماما شوية.

مش لازم تفصلي دستتين فساتين

وتشتري دسطة بيجامات شتوي

ودسطة صيفي

وشباشب وقباقيب

وشنط وصنادل وكوتشيات

وشوية عبايات

أصلا وزنك حا يزيد ممكن حاجة بسيطة أو حا تضربي خالص ف

خسارة الهدوم استني شوية.

■ ممنوع الضحك ■

بلاش طرح كتير.

بلاش مفارش مالهاش لازمة.

مش لازم حفلة في الخطوبة وحفلة في الشبكة وحفلة في كتب الكتاب

وحفلة في الزفاف.. خلي كله عائلي والحفلة واجتماع الناس يوم الزفاف.

مش لازم كل الهدوم تبقى جديدة خدي هدومك القديمة معاك ما

حدش ها يحاسبك.

مش لازم تفتحي الدولاب والنيش وكل حاجة والناس تتفرج وتعرف

كل حاجة عندك، وتطلع تحكي بره، دي خصوصيات وعادة سيئة عاوزين

نبطل نعملها.

اعرفي ظروف والدك المادية

أو مامتك لو هي اللي بتصرف في حالة وفاته

وحطي حدود

واكتبي بالورقة والقلم ورتبي الأولويات

في حاجات لازم تشتريها تبقى أولويات.

■ ممنوع الضحك ■

وفي حاجات ممكن تأجلها

وفي حاجات ممكن تتلغي خالص.

وخصوصًا لو لك إخوات أصغر منك.

ارحميهم وخليكي عاقلة

وارحمي عريسك برده، وتوافقي معاه على حاجات الشقة، واختاروا

المتوسط سعره، وارضى ووافقي حسب ظروفه؛ لأن وراه حاجات كتير



هؤلاء مروا من هنا

في بيت كان دافىء قبل أن تنير شاشات الحاسوب، وفي بيوت
كانت تعشش عليها أطياف السعادة قبل أن يحدث الآتي...

مر من هنا

هي: محمد

هو: نعم

هي: هاتيحي تتفرج معايه على التلفزيون

هو: حاضر بس أقرأ الإيميل وجاي.. وبعدين ما أنا قريب أهه

افتحي بس واتفرجي وأنا متابِع معاكِ

هي: إيه رأيك؟

هو: في إيه

■ ممنوع الضحك ■

هي: في الموضوع اللي اتكلمت عنه فوزية السبعاوي

هو: معلش كنت مركز في اللي بأقراه.. قوليلي مختصر

هي: كانت بتتكلم عن (....) إيه رأيك

هو: آه عندها حق

هي: إيه!!! يعني أنا حيوان أليف!

هو: إيه أنا قلت كده!

هي: ما هي قالت إن الستات اللي قاعدين في البيوت دول زي

الحيوانات الأليفة تأكل وتشرب وبس

هو: لأ طبعاً إنتِ ست الستات

هي: ربنا يخليك.. هو انت بتقرأ إيه؟

هو: مواضيع ظريفة جدا

هي: طيب أنا عاوزه أتعلم أدخل على الإنترنت أهو أقرأ شوية

وأسلي نفسي

هو: ليه.. هو انت عندك وقت؟

■ ■ ممنوع الضحك ■ ■

هي: أصلي بأزھق وكمان إنت دايما مشغول عني بالنٓ ومش بتتكلّم معايه

هو: ليه بس ما أنا فعاكِ أهه.. وبعدين بلاش اختلاط على النٓ.. ده مليون بلاوي

هي: بس...

هو: لأ... بلاش إنترنت

وفي تلك اللحظة كان يكتب ردا على صديقة له كتبت منذ لحظات:
(أنا زهقانة) أراد أن يخفف عنها وبدأ يكتب بينما كانت زوجته تفرك يديها أمام شاشة التلفاز وقد ظهرت على وجهها علامات الألم وقالت بصوت واهن..

هي: محمد.. أنا زهقانة.. ومخنوقة.. تعالى اتكلم معايه شوية
هو: طيب بس أخلص أصلي بأكتب في موضوع مهم

.....

مرت من هنا

هي: يا حماده

■ ■ ممنوع الضحك ■ ■

حمادہ: اُیوہ یا ماما

ہی: قوم یالا

حماده: حاضر يا ماما.. قمت أهه.. بتعملي إيه

هي: بأكتب حاجة بس على النت قوم اغسل وشك

حماده: حاضر

ومر الوقت

هـی: حمااااااااااااااااااااا

حمادہ: اُبوہ یاما

ہی: غسلت وشك

حمادہ: آیوہ واتوضیت وصلیت وقاعد وراکی من ساعتها

هه: ساعتها! دی دقیقه

حماده: لا يا ماما نص ساعة

ہی: جعت؟

حماده: قلت لحضرتك أربع مرات عاوز آكل قلتيلي لحظة

■ ■ ممنوع الضحك ■ ■

حماده: أهه التليفون.. ماما هو حضرتك عاوزه الصفحة اللي بتكتبي فيها دي؟

أصلي ها أقفلها وألعب شوية على الكمبيوتر
هي: صفحة إيه

حمادة: كيف تتحاورين مع أبنائك وكيف تطيعين زوجك

* * *

مر من هنا

الأم: تك تك تك.. يا أسامة

أسامة: أبوه يا ماما

الأم: إصحي يا بني.. طول النهار نايم

أسامة: يا ماما ما أنا كنت سهران طول الليل

الأم: طب قوم أقعد معانا شوية

أسامة: يا ماما عاوز أنام... حرام أنام يعني

الأم: خلاص يا حبيبي.. نام

■ ممنوع الضحك ■

أذن العصر

الأم: تك تك تك.. أسامة

أسامة: يوووه... أيوه يا ماما

الأم: يا بني العصر أذن من ساعتين وانت ضيعت الظهر.. قوم الحق

العصر قبل ما المغرب يؤذن

أسامة: حاضر حاضر. اعملي بس الشاي

ومرت الساعات واستيقظ أسامة بعد أن نام الجميع، جمع كل

الصلوات ودخل إلى المطبخ، ووجد طعامه ملفوفا بعناية ومغطى

بفوطه بيضاء.

أكل وحده

وشرب الشاي وحده

وسهر وحده

ونام بالنهار وحده

بعد أن قضى الليلة كلها على الحاسوب يرددش مع أصدقائه

ويتحاور ببراعة

■ ■ ممنوع الضحك ■ ■

ولم يفتته أن يشكر صديقه على موضوعه الذي طرحه وكان عن (البر
بالوالدين)

* * *

مرت من هنا

قرارداد

دق جرس المنبه

هي: أحمد.. أحمد.. قوم علشان معاد الشغل

هو: حاضر.. اعملي القهوة بسرعة

هي: من عیونی

هو: تسلم عيونك

هي: آدى القهوة.. وآدى القميص كويته.. وآدى الجزمة لمعتها

هو: تسلميلي يا ست الكل

ہی: ربنا یخلیک لینا یا رب ویکرمک

هو: عارفه يا زكية أحسن حاجة إنك مش بتشتغلي.. مش عارف لو

■ ممنوع الضحك ■

كنتي بتشتغلي كنت ها أعيش إزاي

هي: ليه

هو: بأغير عليكِ.. والغيرة بتاكلني لما بأفكر إنك واقفة تنشري بس

في البلكونه.. تخيلي بقى لو خرجتي.. ها أموت

هي: بعد الشر عليك

هو: أنا نازل

هي: ممم.. ممكن أدخل النت شوية .

هو: مش إحنا اتكلمنا قبل كده وقلت لك أنا بأزعل من حاجات

معينة

هي: صدقني أنا بأقرا كتير وبأستفيد وبأكتب في مواضيع حلوة

هو: لأ... مش موافق

وخرج زوجها ورن الهاتف

ترررررررررر

هي: ألو

■ ممنوع الضحك ■

صاحبتها: إنت فين؟

هي: معلش مش ها أقدر أدخل

صاحبتها: ليه؟ برده جوزك مش موافق؟

هي : أيوه

صاحبتها: أدخلي وهو مش موجود.. بالنهار يعني.. ومش لازم

تقوليله.. وبلاش خالص لما يكون في البيت

هي: تفتكري

صاحبتها: هو احنا بنعمل حاجة غلط!!! وبعدين اللي بنكلمهم

متجوزين ودول زي اخواتنا

هي: عندك حق.. ثواني وجايا لكم

* * *

ترى

كم مرة تنظرين أختي في وجه ابنك وهو يكلمك

وهل عدد مرات نظرتك للشاشة أكبر أم أقل؟

■ ■ ممنوع الضحك ■ ■

وكم مرة تتحاور مع زوجتك في أي شيء نتحاور فيه هنا؟
وهل تتحاور معها كما تتحاور مع الأشباح التي تخاطبها على الشاشة
وكم مرة تتابعين كلمات زوجك كما تتابعين كلمات صديقاتك على

المنتديات

وهل تعملين بما تنصحين به
وكم عدد المرات التي رددت أمك فيها عن باب حجرتك يا بني ويا
أخي الشاب

وهل بقي من عمرها من اللحظات ما يكفي لترضى عنك

دعونا لا ننساهم

وتذكروني

فقد

مررت من هنا!



احترس من المهلبية

المهلبية هي علاقات هلامية جيلاتينية على شبكة التواصل الاجتماعية
وبتلاقيها ملخبطة وفيها حاجات بتمشي وكلاكيغ؛ لأنها صحوية بين
اتنين في شات ورسايل مستخبية وتالتهم شيطون الخناس.

وتعالوا نشوف مثال:

مهلبية سادة

- جوجو وتيتي

اللي هم (جابر) وفتحية

ودول بيعبوا بعض من سكات على الفايسبوك وفاكرين إن ماحدش

واخذ باله

هو يحط صورته بالقميص المشجر، وهي

■ ممنوع الضحك ■

like

وهي تحط صورتها بالعناية البرتقاني أم كسر، وهو

.like

والكومنتات بتسيح خالص وفي رسائل خاصة

وبابا قاعد يدفع فواتير الإنترنت، وماما فاكراها بتذاكر

وبعد الشات اللي كله حب بيقول لها:

لا إله إلا الله

وبتقول له:

محمد رسول الله

مهلبية بالآيس كريم

- فيفي متجوزة وعندها 38 سنة

ورامي 25 سنة

(هي تقول له ياخشى كميلة وحا اشوف لك عروسة..)

■ ممنوع الضحك ■■

وهعهعههع.. وديجي ديجي دو...

على فكرة

هو مش زي أخوك الصغير، ولا ابنك

وحا تنزحلقي قصدي تنزلقي في الشات وممكن تتكسر رقبتك.

مهلبية بالمكسرات

- حمادة متجوز وشوشو متجوزة

والشيطان بيزحلق هنا خالص وممكن حمادة يقعد يكتب بالساعات

لـ شوشو علشان عندها مشكلة مع جوزها، أصله جرح شعورها لأنه بياكل

البطيخة مراكب مراكب مش مكعبات بالشوكة، وبتفضفض لحمادة، وهي سائدة

على المكنسة ورابطة راسها بالإيشارب الأخضر وبتعيط.. علشان بتثق فيه.

وحمادة غرقان في المهلبية وفاكر نفسه بابا ضياء بتاع برنامج "ماذا

تفعل لو كنت مكاني".

وقاعدة بالبيجامة الكاستور المقلمة وشعره منكوش وبيكلمها على

الشات وسايب مراته دمعته على خدها..

■ ■ ممنوع الضحك ■ ■

طب مش تشوف نفسية مراتك الغلبانة الأول، واللي ها تتسأل
عليها قدام ربنا.

صديقتي الحبيبة والغالية:

تعالى وفضفضي معاياه أنا واخواتك

معانا أم محمد وأم أحمد وأم سارة وأم رامي

وفاضل لنا أمانا الغولة، ونبقى كملنا الطقم، وممكن نعمل جروب ونسميه

"فضفضي براحتك يا حبيبتى"

ما تفضفضي لواحدة ست أهى حنينة برده

هو لازم راجل!

بلاش المهلبية، وخليكي في الرز بلبن

وتعالى فضفضي لاختواتك

إحنا هانريحوكي يا شابة



35

أشياء تعين على خفض البصر

ركزوا كدهوّن

علشان تقرب من ربنا

الآباء

مش لازم تسأل على مستوى ابنك الدراسي كل يوم ورايح جاي ع
المدرسة... عرفنا إنك أب صالح

كفاية

(الأبلة حلوة ويتحط روج)

ومراتك الغلبانة بتحل الواجب وطالع عينها.

الشباب

وأنت ماشي في الشارع بص على جزمتهك وعد بلاط الرصيف، وما
ترفعش راسك إلا وانت بتعدي الشارع بس، الناس حا تفتكرك مفكر أو
كاتب وكده، وحا تتشهر بعد فترة بإذن الله.

(قول يا رب)

البنات

خليكي خجولة وبصي في الأرض ودوري وبحلقي، يمكن ربنا يرزقك
وتلاقي جنيه هنا والا هناك،
حا ترزقي إن شاء الله

المثقفين

لو أنت ما شاء الله مثقف ومتابع النشرة أو برنامج حوارى من دول
والمذيعه حلوة، ركز في شريط الرسائل، مسلي وجميل وبيحكوا حكايات.
بلاش تنقل نظرك مباشرة من على وش المذيعه وتبص لمراتك فجأة،

■ ممنوع الضحك ■■

إديها فرصتها دي غلبانة و لسه غاسلة المواعين ونفسيتهها تعبانة.

بص للنجفة لحد ما المذيعه تمشي، وأمرك لله.

الستات

ركزي على الكرافتة بتاعة المذيع أو ودان البطل لو متابعة مسلسل،
وبالمتابعة ها تعرفي مين بيكرر الكرافتات ودي تمارين للذاكرة.

وبلاش تركزي مع إيدنين المذيع لو متعصب علشان ها تدوخي
وممكن تتحولي بس مش مشكلة.

النضارات

لو أنت بتلبس نضارة أبشر، اقلع النضارة واتفرج وإدعيلي، هاتشوف
طشاش بس ها تبقى سامع كويس ما تقلقش.

(اعتبره راديو أجدادنا كانوا عايشين من غير تليفزيون وكانوا زي الفل)

العائلات

لو المشكلة في جوزك وللأسف مدمن مسلسلات وأفلام، خلي
حركاتك سريعة

■ ممنوع الضحك ■

أول ما البطلة تيجي إخطفي النضارة، وقولي بصوت مصطنع رقيق
تصحه نبرات الحنان، واحذري من نظراتك:

- الله يا حبيبي، باحب شكلك من غير النضارة.

ها يفرح بنفسه وينسى البطلة.

(مؤقتًا)

الرياضيين

بلاش تتابع الأولمبيكات

أيون...

وتعمل رياضي

في جمباز وبنات ومايوهات

وانت كنت عارف من الأول... يبقى قاصد وسيناتك ها تزيد..

تابع كل الألعاب الثانية وبلاش دي.

■ ممنوع الضحك ■

(وانتِ.. إلغي القناة وجوزك في الشغل)

ربات البيوت

لو لقيتي واحدة من بتوع... سيداتشي أنساتشي ساداتشيبي

إخطفي الريموت ما تسكتيش، وهاتي سبيس تون للعيال.

اشتري له جرايد.. القراءة للجميع

وخدي بالك من جوزك، مش لازم قناة فتافيت طول النهار..

لأن اللي بيغرفتوا ويفتتوا ويتفتتوا، ستات ومستشورين ولاسين

وأنت ماسرحتيش من أول إمبارح.

الزهقانيين

بلاش برامج الرياضة للجميع بتاعة كابتن سماسم اللي لابسين

استرتش دول وبيقفوا صفين وبيتنططوا ويطرقصوا

قال إيه تمارين للمفاصل ووجع الظهر والرقبة، عيب كده.

■ ممنوع الضحك ■

وأخيرًا

ما تبصش للحرام

علشان تعرف تشوف ربنا

وتفتح عينيك في الحلال



كلام للمكلبطين

أيون مكلبطين..

ركزوا معاية

لحد إمتى حاتفضلي حساسة؟

ولحد إمتى حضرتك هاتزعل!

سيبك منهم وحب نفسك وحبى نفسك

ماهو لو فضلت قاعد في عزلة وحاطط إيدك على خدك وما

بتقابلش حد

إنت بس اللي هاتتوجع.

إنت بس الخسران

هاتحرم نفسك من الحياة وتفضل منتظر نجاح الريجيم.

■ ممنوع الضحك ■

مكسوف من نفسك ليه.. هو الطخن حرام!

ما تتكسفش إلا من حاجة حرام

ممنوع الاكتئاب

ممنوع الحزن

ممنوع إنك تتقمص لو حد قال لك اللبس ده مش مناسبك وخصوصا

لو من عيلتك خدها بروح رياضية

اضحك معاهم؛ لأنهم بيحبوك وفكر في رأيهم.

اللبس لبس واسع وشيك

اعرف إزاي تداري عيوبك

بلاش بنطلونات ضيقة يا طماطم

وبلاش القميص والبدلة الضيقة يا بطاطس

عارفين رجاء الجداوي... عارفينها.. صح

طول عمرها شيك!

عمر ما طخنها منع إنها تلفت نظرنا بشياكتها ولبسها ولونه

■ ممنوع الضحك ■

بتعرف تخبي عيوبها

البسي اللي يناسب جسمك وانبسطي مع البنات.. وعقود بقي

وإشارات وعيشي حياتك

ولما تخرجي حافظي على الحجاب.

عيش حياتك وبلاش تزعل

على فكرة دمكم خفيف

ما اعرفش ليه بس هو كده

الطخان زي العسل وروحهم خفيفة

لو حبيت نفسك وتقبلتها

ها ينجح الرجيم

آه والله

وها يبقى سهل.. لأن معنوياتك مرتفعة

ولأنك فرحان ومرتاح نفسيًا

عزيمة بقي وإصرار وكده

■ ممنوع الضحك ■

ما هو لازم برده ننظم أكلنا علشان صحتك أصل الصحة نعمة
خلاص

من النهارده لازم تضحك
بص لنفسك في المراية وكلمها
قول لها أنا بحبك وحاساعدك
ابتدي رجيم وكافيء نفسك كل أسبوع مرة.. واكتب لنفسك لما
تخس كلام جميل

امشي كتير وسبح واستغفر وأنت ماشي
ولو مرة حد سخر منك أو زعلك كبر دماغك
وعلى رأي المثل
البننت اللي ملهاش خدود.. ملهاش وجود



37

احتفال بريء

دار حوار ساخن في أحد المصالح الحكومية حيث دلفت إحدى الموظفات بلباسها الأنيق وقوامها الرشيق وعطرها الفتان فأدارت رؤوس الجميع.

وكانت نهاية اليوم.. عودة الأستاذ "منير" إلى بيته ساخطاً على زوجته التي ذهب بريقها بسبب الحمل المتكرر، وصارت كئيبة كما همس لنفسه وهو يصعد الدرج خطوة... خطوة

وأخيراً.. وضع المفتاح في الباب.. وأداره ليدخل، وقال بخنوع:

-السلام عليكم.. مالك يا حبيبتى؟

قالت بآلم:

■ ■ ممنوع الضحك ■ ■

- أهلا يا منير.. ما نمتش ولا ثانية يا منير، العيال زي القروء من
ساعة ما انت خرجت وهم على دماغى.

قال برثاء:

- معلش ربنا يعينك.. ب.. بأقول لك إيه

ردت وأحد أبنائها يتسلق كتفها:

-أيوه يا حبيبي

قال بحزم:

-إحنا لازم نبدا ريجيم من بكره

ردت بهدوء وهي تحاول أن تكتم صرخات الألم بعد عدة لكومات

من ابنها على ظهرها وهي تتحدث:

-وماله يا حبيبي.. نبدا

قال بحماس شديد، وقد بدا البريق في عينيه:

-وإيه رأيك تقصي شعرك وتضريه في الخلط من زمان ما شفتكيش

كده

■ ■ ممنوع الضحك ■ ■

أجابت ببرود:

-حاضر من عنيه بعد ما أخلص تطبيق الغسيل ها أنزل أقص شعري

قال بانبهار:

-وعاوزك كده تلبسي فستان جميل جميل، آخر حاجة.. وحطي

مونوكير

قالت بصوت مشروخ:

-حاضر يا حبيبي بعد ما أغسل المواعين ها أنزل أشتري فستان

بكرانيش، وها أحط مونوكير

قال وهو يرفع حاجبه الأيسر:

-وحطي روج

أجابت في خفوت:

-حاضر ها أكوي قمصانك وأروح أحط روج

أضاف وهو يرفع حاجبه الأيمن:

■ ممنوع الضحك ■

-واعملي حاجة في دماغك

أجابت ببهجة مفتعلة:

-حاضر ها ألع النجفة وألبس الأباجورة في دماغي

أضاف أخيراً:

-وركبي رموش... عاوز رموش.. رموش

ردت وهي تجرّ على شفتيها وابنتها تجذبها من شعرها:

-حاضر يا حبيبي... رموش رموش

واتجه إلى غرفته حيث نام لساعات طويلة، وفجأة، وبعد أذان

المغرب بلحظات استيقظ على صرخة مريعة..

فتح عينيه فإذا الغرفة مظلمة، والدخان منتشر في كل مكان،

ورائحة الحريق تملأ أنفه، حاول أن يتحرك من مكانه، فإذا بها تنقض

عليه وتمسكه من كتفيه.

■ ممنوع الضحك ■

قال بفزع وقد ارتعدت فرائصه:

-فيه إيه.... إنت مين؟

قالت بدلال:

-أنا يا حبيبي

ازدرد ريقه بصعوبة وقال:

-عينك مالها وإيه الأسود اللي حواليتها ده؟.. وشعرك ماله إنت

اتكهربتتي؟ وإيه الأحمر اللي حوالين شفایفك ده... ولا بسه جلابيتي البني

ليه ومين قطع كامامها كده؟

قالت بفرح:

-مش انت عاوز رموش وأسود وأحمر وكرانیش

قال وهو يرتجف:

-آه يا سوادي قصدي يا حياتي.. بس ليه... ؟

■ ممنوع الضحك ■

قالت بدلال:

-أصل النهارده الهالوين يا حبيبي.

* * *

«خفف عن زوجتك الضغط والمسئولية وهي ها تلاقي مساحة

وتهتم بنفسها من غير ما تطلب»



حقه عليه

كلمتين ما بيطلعوش إلا من قلب بيحب بجد
قلب نضيف، بيبقى جاي يصلح لأنه مصالح نفسه
ساعات تتخانق مع شريك حياتك
زوجك... زوجتك

نصفك الثاني زي ما بيقولوا.. والأصح (كلك) الثاني ما هي خلاص
بعد الجواز والحب مابتبقوش نصين بتبقوا حته واحدة علشان كده
بتتوجع قوي لما بتزعل منه.

بتزعل وتبعد وتسكت وتفكر وتفكر
وتحس إنك بتتحرق.

■ ■ ممنوع الضحك ■ ■

ولو حد حاول يهديك مش هتسمعه ولا هتشوف كلامه لأنك بتبقى
عاوز تحكي بس اللي بيوجعك..

عاوز حد يسمعك.

وعلى فكرة مش هترتاح مهما اتكلمت ومهما بكيت؛ لأنك مش
هترتاح إلا لما تتكلم مع اللي أنت أصلا زعلان منه.

الشیطان مش هيسيبك وهيفكر بکل غلطة وكل هفوة
وممكن حاجات أنت وقتها اتصرفت بحكمة وعديتها وأخذت ثواب..
بس إبليس اتغاض وعاوز يحبط لك ثوابك ومش هيسيبك.
وهتلاقيك بتقول لنفسك وللناس:

(أنا) عملت مرة

و(أنا) سامحت مرتين

و(أنا) ما رديتش في اليوم الفلاني

ومش كفاية إن (أنا) استحملت كذا وكذا

■ ممنوع الضحك ■

طب وبعدين! ولحد إمتي؟

فاكر.....؟

فاكر لما شفتها أول مرة، لما رحت تخطبها.. ركز.. وافتكّر

مش قصدي أول نظرة، لأ... أول دقة قلب في صدرك حسيت بيها،

وأنت بتتكلم معاها وعرفت إن هي دي

خطفة كده في روحك..

بتبقى عاوز تحط إيدك على قلبك علشان تمسكها قبل ما تهرب

من فرحتك...

بتزعلها ليه بقى.. دي حبيبتك

طيب مش بتسامحها ليه... سامح وعديها.

فاكرة.....؟

فاكرة لما كنتي بتحسي إنك طيارة في السما وسط السحاب وعاوزة

تحضني كل الناس وتتنططي من الفرحة علشان هو اتصل بيك وقال لك

بحبك..

■ ممنوع الضحك ■

مش ده جوزك حبيبك..

بتزعليه ليه؟

طب مش بتعديها له المرة دي ليه؟

ما تقولوش كرامة

"الحب بين الزوجين مافيهوش كرامة، في صحيح مسافات وزوايا بتتظبط من قبل الجواز، لما بتروح تخط على باب بيتها وتختارها صح، بنت الطيبين ومتربية وعارفة يعني إيه (أصول) ولما بتوافقي عليه لأنه على خلق ودين مش منظر وبس، ساعتها بيبقى في رصيد قديم، ومواقف تتشال على الرأس، وكلام مايتنسش
كلام حلو، وحاجات حلوة كمان كتير".

افتكر كام مرة فرحت مع (كلك) الثاني، افتكر السكينة اللي انت مفتقدتها دلوقت وانت زعلان معاها، مش هترتاح على فكرة إلا لما تتصالح معاها... كلنا كده.

في مساحة ود ورحمة لازم تفضل في كل بيت وكل قلب

■ ممنوع الضحك ■■

عندها بتنسى كرامتك وتقلع التاج اللي على راسك وتمشي حافي
ما حدش أحسن من حد

إنت وزوجتك

وانت وزوجك

مش عيب ولا حرام إنك تقول.. أنا أسف
(حقك عليه)

اتشجع وقولها وانت ثابت وخذ نية
خدها لله

قول لحبيبك.. حقك عليه

ويا بخت اللي يسبق ويأخذ الثواب والأجر.

اللهم أنزل السكينة على بيوتنا جميعا وبيوت المسلمين
واسعد كل زوجين



■ ممنوع الضحك ■■

بسرعة وهي تطير كالفراشة، استقبلها بابتسامة هائلة وقاد سيارته
بتهور وكأنه شاب مراهق!

بدأ يضحك ويغني ويهمهم و يحدث نفسه..

لم تفهم منه شيئاً.

سألته وهي تتعجب:

هو إحنا رايعين فين يا حبيبي؟

أجابها وهو يبتسم ابتسامة مأكرة:

مفاجأة.

تسارعت دقات قلبها وأخذت تفتش في ذاكرتها عن تاريخ
اليوم.....

هل هو يوم ميلادها؟! ... لا

هل هي الذكرى السنوية لزوجهما؟!..

لا لا لا

ارتابت قليلا، وابتلعت ريقها بصعوبة فهي لن تحتمل

■ ممنوع الضحك ■

ربما هي فعلا المفاجأة التي تنتظرها منذ سنوات
وجبة غذاء أنيقة، في مطعم فاخر، على مائدة مستديرة، عليها
شموع، ووردة حمراء، وبطريقة رومانسية سيقول لها:
(زوجتي، زوجتي، أنتِ حبيبتي أنتِ).
التفتت إليه وقالت بدلال وبضحكة خجولة لطيفة:
عرفت يا شلبي حا تغديني في مطعم سحتوت.. صح؟
غضن حاجبيه وأجابها، وهو يدير زر الراديو باحثًا عن إذاعة الشرق
الأوسط

وقال بصوت مخنوق:

لا يا شلبية.. كارفور عامل عرض على زيت كالالا على كل إزازتين
كيلو رز هدية، قلت آخذك بالمرة نجيب لوازم البيت قبل زحمة رمضان.
كل سنة وأنتم طيبين.



الوردة الحمراء

وأخيراً.. شعر بحنين، ودق قلبه، وتذكر أول مرة رآها بالفستان
الوردي، قرر أن يشتري لها وردة وهو في طريقه إلى البيت،
أسرع يقود سيارته إلى محل الزهور المشهور الذي يقع قريباً من بيتهم،
وترجل من سيارته وهو يغني:
اسبقني يا قلبي اسبقني
تيرا رااا
على الجنة الحلوة اسبقني
قرر أن تكون الوردة حمراء رمزا لحبه لها فانتقاها بعناية وقبلها
وهو يضعها بجواره وهو يقود سيارته متجهاً إلى البيت.

■ ■ ممنوع الضحك ■ ■

هرول على الدرج وفتح الباب، وانطلق مشتاقاً يبحث عنها هنا وهناك..

أين أنتِ يا أميرتي؟

أخيراً وجدها في المطبخ

أقترب بحنان وهمس في أذنها:

-حبيبتي أنا جيت لك وردة

أجابته بمرح:

-الله.. حلوة قوي يا حبيبي

ثم أزاحت بلطف دموعها التي سالت من تقطيع البصل بأطراف أناملها..

وبحركة خاطفة.. مسحت أنفها بكم جلبابها بعد أن شهقت شهقة

عميقة فوق حلة الملوخية، ثم أشارت إلى صدره بالسكين وقالت بتهديج:

- حطها هناك على الرُخامة يا حبيبي لحد ما أخلص التقلية وأنا ها

أشمها بعدين،

وخذ في إيدك طبق الممبار والفتّة وحطهم على السفرة، وخليك

■ ■ ممنوع الضحك ■ ■

قاعد لحد ما آجي لك لاحسن العيال يكبوا الشورية على الأرض.. وقبل
ما تمشي حط الوردة في شوية ميه.

قال برثاء:

-الوردة خلاص ماتتيا حياتي.

.....

"شجعي زوجك يعبر عن مشاعره.. الحياة مش مطبخ وبس"



41

في الركن البعيد الهادي

اختاري مكان هادي في البيت

كرسيين وترايزة

هاتي ورقة وقلم

نادي جوزك وقعديه

هزي اللبة

وبرقي

خدي نفس عميق واسأليه الأسئلة دي وخليه يختار إجابة من الثلاثة:

← السؤال الأول

❖ لو أنا مت بعد الشر عليا يا حبيبي هاتعمل إيه؟

1 - طبعا هافرح وأتجوز واحدة ثانية.

2 - هافضل حزين طول عمري ومش هاتجوز تاني.

3 - هازعل شوية، وبعدين للأسف هاضطر أتجوز.. علشان العيال

■ ممنوع الضحك ■

لو اختار الإجابة الثانية يبقى يخاف منك

وأنت شخصيتك قوية

(طول ما فيك روح)

لو اختار الإجابة الثانية يبقى يخاف منك

وأنت شخصيتك قوية

(طول ما فيك روح)

← السؤال الثاني

♥ لو طلبت تكتب لي كل أسلاكك باسمي هاتعمل إيه؟

1- هارميك من البلكونة

2- هاسييك جنب الأنبوبة

3- ها اقتلك

لو اختار أي إجابة من الثلاثة

يبقى صريح.. صريح.. صريح

وعرفتي تختاري

السؤال الثالث

♥ * عمره فكرت تتجوز واحدة ثانية؟

1 - أيون

2 - طبعًا

3 - آه

لو اختار أي حاجة

يبقى صادق يا حبيبتي صادق

ومش بيحب الكذب

ما شاء الله عليه

← السؤال الرابع

♥ أنت لسه بتحبني نزي زمان؟

1 - لأ

2 - أنت مين أصلًا

3 - ولا أعرفك

■ ممنوع الضحك ■

معلش يا حبيبتي أنت فاجئتيه بالسؤال

ولا كإناك سألتني

عدي على اللي بعده

← السؤال الخامس

♥ إيه أكثر حاجة بتعجبك نيا؟

1 - بتفكريني بربنا كل ما أشوفك

2 - باستغفر ربنا كثير وأنا معاك

3 - الناس بطلت تحسدني

شفتي... طول عمرك متدينة

وقربتيه من ربنا.

← السؤال السادس

♥ إيه رأيك في شخصيتي؟

1 - هي فين

2 - طب وريهالي الأول

■ ■ ممنوع الضحك ■ ■

3 - يعني إيه شخصية؟

معلش يا حبيبتي

ما يقدرش يجاوب على حاجة ماشافهاش

إنسان أمين أمين..

طول عمره أمين

خلصنا كده

اطلعي بقى فوق

واقري الأسئلة الستة دي تاني

وإوعي وإوعي تسألها لجوزك

أبدًا أبدًا

مش كل الكلام يتقال.



المربحية بالفندقوش

أنا: أنا اشتريت المربحية بالفندقوش.

أنتم: إيه المربحية بالفندقوش دي يا خالتو؟

أنا: حاجة كده جميلة

قوي جدا خالص خالص، شكلها ملفلح، وطعمها زي السراريش،

وريحتها تحفه زي المهايخ

وعليها من فوق دحاليج، وحلوة مع الشاي بلبن.

أنتم: الله!.. أكيد حلوة.. شكلك فرحان يا خالتو

يا ترى بالشوكولاتة دي والا الكريمة إنتِ أكلتي كام حته؟

طب عاوزين نأكل وندوق وكده.

■ ممنوع الضحك ■

أنا: في ناس كثير أكلتها ربنا يرزقكم بقى ويحنن عليكم
يا عيني يا مساكين.

أنتم: يا ترى شكلها إيه؟
وإيه السراريش دي؟

ومين الدحاليج دول؟

وروحوا وناموا واحلموا وافتحوا التلفزيون

واتفرجوا على الإعلانات والأغاني والأفلام واسمعوا كام بيت شعر
في وصفها وقصة قصيرة ورواية عن شعورك ، أنت بتأكلها.
في جزء منكم هيتخيلها حلويات ، ، الثاني حوادق ، والثالث هيشوفها
فطيرة والرابع برايم برايم.

وارفع سقف التوقعات لفوووق لحد ما رجلك تطير في الهوا
واحلم أحلام وردية وخيالية، واحلم معاينة ببكرة جاي ولو ما جاش
إحنا نجيبه بنفسنا.

■ ممنوع الضحك ■

قوم إيه بقى لما تيجي تأكلها-ورغم إنها حلوة جدا وبما لا يخالف
شرع الله- تقول إيه ده.. أنا كنت فاكرها أحلى من كده..

ويجيلك إحباط، وممكن تدعي عليه

أهو ده اللي بيحصل مع الحب والجواز

إنهرينا في الأفلام والمسلسلات وأغاني أم كلثوم وعبد الحليم كلام

في الحب وسيرة الحب وسنين الحب وعذاب الحب

وكل بنت قاعدة مستنيه العريس الوسيم الشاطر

(الشاطر حسن)

ييجي بسلامته راكب حصان أبيض، ويخطفها من أبوها، وتعيش في

قصر كبير وتلبس فستان واسع وتغيظ الملكة.

أو يكتب فيها شعر ويتشعبط على المواسير، ويطلع لها من البلكونة

ويقع فتتكسر رقبتة ويتجوزوا في المستشفى.

والشاب من دول فاكر إنه هيتجوز سندريلا، وهيرجع الظهر يلاقي

الأقزام السبعة خلصوا شغل البيت، وغسلوا المواعين وهي الأميرة

■ ممنوع الضحك ■

النائمة وهي صحتها بقبلة رقيقة على جبينها، وهتقوم من النوم مستشورة
وحاطة روج ولابسة جزمة.

وسقف التوقعات بيرتفع لفوق أكثر لما بتتكتب قصص الحب وكلام
الحب مع صورة اتنين شكلهم حلو...

وهي لابسة ومتأنتكة وهو حاطط جل في شعره وشايلها، أو ماسك
مناخيرها مسكة سينيمائية وهي حاضناه وماسكة ودانه.

ويبيص لها بحنان وبتبص له بدلال

(مع الاعتذار لدلال)

وروحوا وناموا واحلموا وافتحوا التليفزيون واتفرجوا على الإعلانات
والأغاني والأفلام واسمعوا كام بيت شعر في وصف الحب وقصة قصيرة
ورواية عن شعورك وأنت بتحب.

وتعالى اتجوز

وتعالى اتجوزي

الإنسان اللي اخترتيه وفرحانة بيه وطبعا اللي لسه عايش في الأحلام

■ ■ ممنوع الضحك ■ ■

ومتوقع شيء خيالي وساب نفسه للمؤثرات المرئية وكلام الناس...
والرغي والفتي الكثير ونسي الواقع هيكون شعوره كده زي اللي
أكل المربحية بالفندقوش ولقاها مش حلوة وزى ما كان فاكرو..
رغم إنها حلوة وزى العسل.

افهموها صح

"الحب بين الزوجين ليس له قالب واحد ولا نموذج متفرد كل زوجين
لهما حالة خاصة من الاندماج والتفاهم والحب تختلف عن الآخرين.
والسعادة مذاقها مختلف من شخصية لأخرى فلا تطبق تجارب
الآخرين على نفسك".

الحب مش محتاج أميرة وأمير وملكة جمال وفارس الفرسان.
الحب يعني تحبها بعد الجواز حتى وهي حامل ووشها مورم
وخدودها منفخة.

يعني لو بقى أصلح وبكرش يفضل فارس أحلامك.
يعني مش محتاج يكتب شعر كفاية كفاه اللي بتطبطب على ظهرك

■ ممنوع الضحك ■

ما هي دي ترجمة كلمة بحبك.

يعني هي جميلة لأنك بتحبها حتى لو هي مش جميلة.

يعني كل لحظة تمر عليكم مع بعض بتعيشوا جوا بعض.

يعني إنت مسجون في روحها حبس انفرادي.

يعني أي بنت حلوة مش هتلفت نظرك؛ لأن قلبك شبعان بحبك

لزوجتك



مفاجأة

في بيت دافى كانت ترتجف وهي قلقة على زوجها الحنون، تنتقل
بين نافذة غرفتها والباب وفي يدها الهاتف
وفجأة...

- مساء الخير يا حبيبتي

- مساء الفل يا حبيبي إتأخرت ليه أنا قلققت عليك؟

- أن أن أاااا مفاجأة

- إيه ده هدية.. مش معقولة!

مش مصدقة نفسي.

- آه والله شفتي.. حاجة بقى إنما إيسيه.

- طب وريني كده.

■ ■ ممنوع الضحك ■ ■

- لا استني أنا اللي هافتحها علشان ما تبوظيش العلبة.
- طب هات بس ما تخافش.
- قلت لك لأ. لازم أنا.. ده أنا دافع فيها دم قلبي
- طيب بسرعة افتحها أنا فرحانة ربنا يخليك يا حبيبي يارب.
- أهه.. شفتي خاتم ذهب عيار أربعة وعشرين.
- مش شايفة نزل إيدك أنا قصيرة مش شايفة.. هات بقى.
- ياااه حا ياكل من إيدك حته.. مبروك عليك.
- ربنا يخليك يارب.
- بس ما تغسلش بيه المواعين بقى.
- حاضر.
- وخليه للخروج بس لاحسن يتبهدل واللمعان يروح.
- حاضر.
- وشيليه في علبته.
- حاضر.

■ ■ ممنوع الضحك ■ ■

- وفرجيه لامامتك وكده.

- حاضر

وبعد أسبوع..

- يالا بينا نروح لماما إلبسي بقى وما تنسيش الخاتم اللي جبتهولك

الأسبوع اللي فات.

- حاااضر.

- يا رب الأكل النهارده يطلع حلو زي الأكل اللي طبختيهولي يوم ما

جيت لك الخاتم.

- يارب.

وبعد شهر....

- ها يا حبيبي كده لبسي حلو والعباية والطرحه.. شوف كده..

والجزمة والشنطة.. أنا حلوة؟

- طبعا فاضل بس تلبسي الخاتم اللي جبتهولك الشهر اللي فات..

ده فرح أختك وكده.

- حاااااضر.

خليك في هالك!

في ناس ما يهمهاش غير نفسها وبس.. مثلاً لو قلت لهم:

-في واحد داخ ووقع في الشارع تعالى نفوقه ونوصله بيته.

-مالناش دعوة كل واهيد في هالوه يا مهبي.

-السلم مش نضيف ومافيش بواب في العمارة تيجوا كل واحد مننا

ينضفه يوم.

-مالناش دعوة كل واهيد في هالوه يا هنفي.

-الست اللي في الشارع اللي جنبنا حايطردوها علشان مش بتدفع

الإيجار من يوم ما جوزها مات.

-مالناش دعوة كل واهيد في هالوة يا هوسني.

-ماما تعبانة وسخنة والمطبخ بقى شبه جبالية القروء ما تيجي

نقوم ننضفه علشان نفرحها.

■ ممنوع الضحك ■

-مالناش دعوة كل واهيد في هالوه يا هلبي.
-أسامة تعبان والامتحان قرب تعالى نزوره ونصور له المحاضرات.
-مالناش دعوة وكل واهيد في هاله يا فتحي.
-في ناس غلابة جعانة كتير تعالى نعمل أكل ونوزعه عليهم.
-مالناش دعوة كل واهيد في هالوه يا هنفي.
-جارتنا ولادها سافروا وبقالها أسبوع مش باينة ما تيجوا نخبط
عليها وناخد لها كيلو برتقان ونزورها يمكن عيانة.
-مالناش دعوة كل واهيد في هالوه يا صبي.
-المسجد عاوز يتنصف تعالوا نكنسه وننصفه ونعطره كده ونخليه
فله ونغسل الحمامات قبل يوم الجمعة.
-مالناش دعوة كل واهيد في هالوه يا صاهبي.
عارفينهم الناس دول؟
منهم لله



عش الحب

عش الحب

جاء الصباح وشقشقت العصافير

وغردت البلابل واهتزت الأشجار وطارت الفراشات وعشش الحب

في بيت سعيد

- صباح الخير.

* صباح الفل يا أجمل زوج في الدنيا.

- بأقول لك إيه يا حبيبتي قومي اعملي الشاي وسندوتش جبنة

بطماطم على بال ما ألبس علشان إتاخرت على الشغل.

مش قادرة يا جميل أصلي كان عندي أرق وتعبت بالليل يا حبيبي.

- هو كل يوم أرق!.. ألف سلامة.

■ ■ ممنوع الضحك ■ ■

* روح أنت يا عسول حط البراد الأمور على النار واعمل الشاي.

- حاضر.

بعد شوية..

- أنا نازل.

- إيه الشياكة دي.. أنور وجدي يا خواتي.. مع السلامة.

وبعد الظهر..

- السلام عليكم.

- وعليكم السلام يا أجمل زوج في الدنيا كلها.

- فين الأكل؟ أنا ميت من الجوع.

- طب قبل ما تغير هدومك يا سكر انزل هات لنا

كيلو طماطم حمرة زي خدودك

وكيلو بطاطس مقطقة زي مناخيرك

وكيلو بصل عسول زي ودانك

وكيلو بدنجان إسود زي عيونك

وعلبة سمنة نونو كده وصغنه.

■ ممنوع الضحك ■

- وماقلتيش ليه الصبح وأنا نازل؟
 - أنت من يوم ما مامتك بطلت تبعت أكل ماطبختيش.
 - مارضيتش أقلقك يا جميل وقلت لما ترجع.
 - طب مافيش أي حاجة تتأكل في البيت.
 - في تونة صغنونة روح برجليك الأمورة هتلاقيها في المطبخ العسول
 - ويا ريت تغسل المواعين علشان أنا حطيت لك لون المونوكير اللي بتجبه.
 - طب تعالي كلي معايه.
 - كل أنت بالهنا والشفأ يا جميل.. أنا أكلت ساندويتش لانشون
- عسوووول
- بالليل...
- هو فين القميص الأخضر؟
 - في الغسيل يا حياتي.
 - والبنطلون الكاكي؟
 - حرقتة وأنا باكويه يا روعي.
 - وشراباتي كلها فين؟

■ ممنوع الضحك ■

- منورين في الحمام يا نور عيني.

- طب وهاغتسلي إمتى.

- ساعدني وحطهم في الغسالة الجميلة المربعة يا عسل وشغلها

على بال ما أعمل لك الشاي يا قمر.

تاني يوم..

تك تك تك..

- ميبين؟

- أنا أمك العسولة يا ننوسة

جاية ومعاه أبوك القمر يا ستوتة

علشان ناخذك على بيتنا المحدث على دماغك يا توتة

لأن جوزك المحروس طلقك يا أمورة

حضري شنطتك المقطقة يا نور عيني



عريس الكتروني

في بيت دافئ وبينما تقف الأم بين الأبخرة المتصاعدة من الأواني
المختلفة لتتعانق في حنان وحب وتحلق فوق هذا البيت الهادئ دخلت
أميرة على أمها وهي تصيح...

- أماه لقد جاءني عريس

- الحمد لله يا ابنتي لقد هرمنا في انتظار العريس المطلوب

- نعم أخيراً يا أمي كم أنا سعيدة

- والله لقد طلع من عيني الاثنتين العريس الذي رفضتيه الأسبوع

الماضي.

- لا تحزني يا أماه، فهذا أفضل منه

ويقول أنه معجب بشخصيتي المنظمة وتفكيري المرتب

- اتنيلي على عينيك يا ابنتي الحبيبة واذهي أولاً ورتبي غرفتك

ومشطي شعر رأسك

-حاضر يا أمي كفاك صياحًا يا غالية أين المحروس بسلامته أخي؟

- وأين سيكون مثلاً! على الأريكة في غرفته يشاهد التلفاز.

- سأذهب لأشاهد معه برنامج (العرب لهم مواهب) فأنا أشجع

المشترك الذي يغني

(بالإنجليزية)

-يا خبيبك الثقيلة أي موهبة عربية تلك وهو لا يغني بلغته الأم!

- لأنه يتيم.. أأ أقصد.. صوته الرائع هو المهم.

- جاءتهم ستون خيبة أين الهوية العربية في المواهب!

-موجودة يا أمي فالحفلة في بلد عربي.. العالم تغير يا أماه نحن

في عصر الإنترنت.

- ليته ما تغير.. حتى اسم البرنامج مكتوب بالإنجليزية واسم

■ ■ ممنوع الضحك ■ ■

- وامصيتاه... داخل صندوق!
- يا أمي أقصد رسالة إلكترونية مكتوبة.
- وماذا قلتي له يا فالحة؟
- سألني عن عمري ودراستي واسم أبي وعنوان عمله وعنك... إلخ إلخ.
- يا وقعتك السوداء.. يا نهارك الذي لن يفوت.. وأخبرته كل شيء.
- لا يا أمي طبعًا ولكن أرسلت صورتني فقط
- حسنًا حسنًا.. ويا خبر بنقود غدًا سيكون مجانيًا، ومتى سيأتي يا فلذة كبدي؟
- لا أعرف
- هل عنده شقة؟
- لا أعرف
- هل هو مستعد ماديًا؟
- لا أعرف

■ ■ ممنوع الضحك ■ ■

- کم عمره؟

- لا أعرف

- وماذا يعمل؟

- لا أعرف... لكنه ناشط سياسي

- یا حسا۱۱۱۱۱۱۱۱ام

- نعم يا أمي

- حبة الضغط من الدرجة الثاني وعصاة المكنسة من خلف باب

المطبخ يا ولدي الغالي.

- حالاً يا غالية.

- النجددودة



منتهى الحب

- عاوز أتكلم معاكِ شوية ممكن؟
- * طبعًا حاليًا هانشر بس قمصانك علشان يلحقوا ينشفوا
- طيب بالمرّة اغسلي البنطلون الكحلي ولمعي لي الجزمة علشان نازل بالليل.
- حاضر من عيوني.
- يالا جيت أهه هاكوي وأنت بتكلمني القميص اللبني اللي كنت لابسه أول يوم في شهر العسل.. فاكِر.
- خلصتي؟
- أنا جيت أهه خير؟

■ ■ ممنوع الضحك ■ ■

- لا قومي رضي الولد ونيميه علشان مش عاوز دوشة
- خلاص نام خير يا حبيبي.. عسول وهو نايم وشبهك خالص
- ترررن.. جرس الباب
- ممكن تفتح؟
- لا رجلي منملة.. افتحي أنتِ الباب
- ثواني هأخذ الحاجات من البواب وراجعة لك.
- وأنت رايحة هاتي لي الموبايل وطفى المروحة وناوليني القهوة.
- حاضر.
- حبيبي أنا خلصت ممكن توديني لماما بكرة وأنت نازل.
- لأ
- ليه بس
- كفاية مرة كل أسبوعين
- طيب ممكن سحر تيجي تزورني

■ ممنوع الضحك ■

- لأ

- ليه

- لأنها هاتقعد تحكي لك على الكلية وتزعلي إنك ما كملتيش وإحنا

قلنا مش هاتكلمي خلاص دراسة علشان البيت والولاد.

- طيب عاوزة مصروف ممكن؟

- هاتعملي بيه إيه إنتِ مش بتخرجي وأنا باجيب كل حاجة.

- كان نفسي في مجلة كده أجيبها من المكتبة وأخذ توتو أمشيه

شوية في عربيته الصبح يعني.

- مالهاش لازمة.. بلاش مصاريف

- طيب ممكن تخرج معايا.

- هانروح فين؟

- نزور أي حد أو نتمشى

- هي البلد فيها حاجة تتراح

■ ■ ممنوع الضحك ■ ■

- وديني الحتت اللي بتروحها كل يوم
- مش وقته.. رايحة فين أنا عاوز أتكلم معاكي
- أنا جيت أهه، خير يا حبيبي؟
- هاخذ رأيك في حاجة ماشي
- اتفضل.. بس غريبة أول مرة تسألني رأيي في حاجة؟ يا ترى إيه؟
- حاجة من حقي ومش عيب ولا حرام
- خير يا حبيبي
- أنا عاوز أتجوز زوجة ثانية
- إيه!



حماتك

ما تزعليش

من حماتك لو بصت لك كتير

وبحلقك يوم ما جت تخطبك

إبنها اللي قالها بصي يا ماما معاه لأنه بيتكسف

مش قصدها تبص كده.

ما تزعلش

لو حماتك قابلت (جوز أخت مراتك) بترحاب أكثر

مممكن يكون دخل العيلة قبلك بست سنين وواخين عليه أكثر

ويمكن أكبر سنا

■ ■ ممنوع الضحك ■ ■

يمكن إنت أحسن فيبراضوه نفسيا ويمكن علشان حاجات بتفوت عليك..

خد بالك

ما تزعلش

لو حماتك ما أكلتش الكيك اللي مامتك قدمته

الكيك حلو بس هي مكسوفة

طيبة على فكرة.. سيبك من اللي حصل في المسلسل

ما تزعلش

لو مرة حماتك قالت كلمة زعلتك

فوتها.. ما هي اللي علمت مراتك الفاتحة والصلاة

وابنك الكبير حفظها من أمه يعني كل سجدة من ابنك في ميزان

حسنات حماتك

وبيدعي لك فيها.. شفت بقى.

ما تزعلش

■ ممنوع الضحك ■

لو حماتك حكت لك عن مشكلة بنتها مع خطيبها مش قصدها
تعمل إسقاط سياسي على خطوبتكم على فكرة هي بتفضفض
وحتى لو كانت قاصدة طنشي.

ما تزعلش

لما حماتك زعلت منك وتقول لك أنت مش مدلع بنتي..

أصلها ما شافتش الفرحة في عنيتها كويس..

شافتكم وأنتم تعبانين بس

بينوها شوية وراضي زوجتك وطبطب عليها وسط أهلها علشان يوم

ما هي تشتكي يقفوا معاك ويعقلوها.

ما تزعلش

إن حماتك بتتكلم على ابنها كتير وبتشكر فيه.. أصلها شالته على

قلبها تسع شهور وبتحبه قوي

زي مامتك ما بتموت في أخوك

■ ممنوع الضحك ■

وزي ما بتحبي إبنك كده..

يعني حتة منها.

ما تزعلش

لو قالت لك الفراخ اتهرت والبامية مش حلوة.. إيه يعني.. قوليلها

هو أنا هعرف أطبخ زيك يا ست الكل علميني... واعملي نفسك مهمة

واكتبي أي حاجه واتصلي بيها مرة والا اتنين واسألني على أكلة حتى لو

ما عملتيهاش وشوفي هتحبك إزاي.

ما تزعلش

من حماتك لما بتلومك..

أصلها متعشمة فيك خير ومنتظرة كلمة حاضر..

يمكن كلامها غلط

ويمكن رأيها مش صح

بس أنت تقدر تطيب خاطرها

■ ■ ممنوع الضحك ■ ■

بكلمتين وبالعقل وتعمل اللي أنت شايفه صح.

ما تزعلش

لو ما حبتكيش زي بنتها..

أصل بصراحة كمان مش بتحبها زي مامتك.. آه والله

خلي كل حاجة في مكانها

أمك ما حدش هيجبك حبها ومش هتتعوض.

ما تزعلش

لو ما حبتكش زي ابنها اللي من لحمها ودمها..

على فكرة دي بني آدمه وكبرت وعجزت وتعبت وضحت

مش العدو اللدود

لازم تحترم وتحترمي مشاعرها

(خدوا بالكم قوي من اختلاف الفكر والتعليم والثقافة والبساطة

وعاملها على قد إدراكها وسنها).

■ ممنوع الضحك ■

ما تخليهاش تحس إنها خلاص راحت عليها وهتشيلها في الصندرة
هتخطها في كرتونة على الرف
وتبص عليها كل أسبوع مرة
وفي العيد تطلعها وتلمعها
ويوم الأم تجيب لها شنطة وتخطها المسكينة جنب الشنطة
والشنطة

سهلها واتفقوا مع بعض
هات خطيبتك أو مراتك واتفقوا اتفاق
هاقول لمامتك يا
(ماما)
وهتقولي لأمي يا
(ماما)

هنبرهم سوا ونسهل على بعض

■ ممنوع الضحك ■■

وفي حضور أمي هاراضيتها على حسابك معلى ساعدينى بكلمتين..
أشكرى معاه فيها وفي تربيتها ونضافتها وأكلها
وخليها تحس إنها ملكة..
وبلاش نشتكى من بعض.. خلينا نشتكى لبعض مننا
وفي بيتنا لما نرجع يا زوجتي إنتِ الملكة
ويا ريت قبلها يكون في البيت هو الملك.



كلام في الحب

يقولوا الحب بعد الجواز مش موجود، وإن الخطوبة أجمل فترة
في الحياة

وإن.. وإن.. وإن

لأ.. طبعًا

الحب مش وردة وقلب وغنوة وشوكولاتة وورد وبنت حلوة
الحب بيتترجم لأفعال إيجابية يمكن مش بتشوفوها.. بس هاتحسوها
طب.. قولوا أنتم بلاش أنا
بابا و ماما طول النهار قدامكم صح؟ فاكرين يوم ما بابا اتأخر لما
كان مسافر ماما وقفت إزاي تستناه رائحة جاية؟

■ ■ ممنوع الضحك ■ ■

بصيتوا لوشها؟

شفتوا الخوف والقلق والفرع؟

سمعتوا دقات قلبها وهي خائفة؟

ما هو ده الحب

إنك تخاف على حبيبك من الخطر

شفتوا بابا وهو شایل شنطة سفر

ومعاد الطائرة بعد ساعة

وقلبه بيتقطع وهو بيبوس رأس ماما وبيمشي ودموعه بتجرى على

خده.. أول مرة تشوف بابا بيعيط

صح؟

ما هو ده الحب

إنك تكره فراق حبيبك

علشان غالي عليك قوي وبقي حتة من جواك

■ ■ ممنوع الضحك ■ ■

فاكر لما ماما كانت عيانة وحرارتها عالية وبابا واقف فى المطبخ
بيطبخ بدالها وهو راسم على وشه ابتسامة حنان
ابتسامة موجوعة
ومخنوقة بألم
ما هو ده الحب
إنك تتألم لألم حبيبك لأنك مش عاوزه يتوجع
شفتى بابا لما مر بطروف صعبة أد إيه كانت ماما واقفة معاه
واستحملت حاجات كتير
ما هو ده الحب
على الحلوة و المرة..
وساعات من حلاوة الحب المرارة بتروح وتلاقي الحبيب راضي
بحال حبيبه حتى لو يشحت
فاكر لما ماما فضلت واقفة تصحى بابا علشان صلاة الفجر وراسها
كانت بتقع وفضلت لحد ما قام وصلى

■ ممنوع الضحك ■

ما هو ده برده الحب

إنك تخاف على حبيبك من نار جهنم.

مش تكون سبب فى دخوله نار جهنم

يبقى الحب مش رغبة جسدية فقط

ومش بننكرها

وديننا الحمد لله بيوجه الغرائز صح

"الحب.. حنان ومودة ورحمة مع بعض وموجود جوانا فعلاً، هايطلع

هايطلع إن شاء الله، بس كل شيء بأوان".



ممنوع الضحك

صباح مشرق.. استيقظت على صوت المنبه فقمّت بنشاط، أحياناً
أكاد أسمع صوت مفاصلي الخشنة وركبي وهي تسلم على بعضها،
أحاول تعديل استقامة عمودي (الفاري)

وأألم قليلاً، لابد أن السبب هو اللبن الرائع الذي أتناوله بطعمه
الجميل بعد أن تزيل الشركة كل ما فيه من فائدة مرات ومرات.. يعجبني
شكل العلبة!

فتحت صنوبر المياه وغسلت وجهي بماء النيل العكر الأصفر الجميل،
ومسحت يدي بملوثاته الرائعة، واستمتعت بطعم الماء العجيب

الصدى، وأنا أتمضمض..

تناولت أصبعا من الموز المسرطن وتناولته، ثم ضغطت زر الغلاية
لأنتقم منها وأبدأ يومي بقوة، اتخذت قرارًا مفيدًا وصنعت لنفسني كيوبا
من الشاي باللبن الممزوج بمياه النيل المفسفة التي ربما لو يَطْو
الفلتر للطم وحسبن وحوقل مما فلتره منها، وأخاله سيدعو بيينا لكل
يوم كلما استخدمناه.

اقتربت من النافذة واستمتعت بالضوء اللطيف، فالشارع رائع
والسيارات تتوقف فيه من روعته أكثر من مرة، وجميل أن تتأمل وجوه
الزكّاب المكفهرة وهم يستمتعون بالزحام والحر وعلى وجوههم تملأ
وتصطف قطرات العرق المملح.

أمامي بعيدًا مدرسة ابني الجميلة والكبيرة والمشهورة، لا أنسى أبدًا
رائحة حماماتها المنعشة وأصوات المدرسين والمدرسات وهم يتابعون
أولادنا بأرقى الألفاظ، وبأصوات رحيمة من حناجرهم المباركة.

وأكوام القمامة المبدعة المتكتلة في الطريق الجانبي إليها وأنا
أسير مع ابني رغم رقي المنطقة!

راقبت ذات مرة رجلًا وامرأة، يفتشان في القمامة بحثًا عن الكنوز
التي خبأها الليلة لهما في طيات الأكياس العبقريّة السوداء، يمزقان
الأكياس، وينشرون البهجة أمام المدرسة، ويعبر من فوقها المارة بحنان.
تذكرت تجمع الأمهات كل يوم، قبل موعد انصراف التلاميذ، وكم هو
مبدع مهرجان الأزياء الذي أراه كل يوم أتردد فيه على بوابة المدرسة، ألوان
بديعة، وبناطيل متعددة الأشكال مع طرح مزركشة، وطلاء الأظافر الأخضر
المتناسق مع الطبيعة والحقائب البديعة.. صحوّة دينية ومنظر خلاب.

ولفت نظري الجو العكر بسحره، والغبار الجميل المنتشر في كل مكان.
رأيت الأشجار الخضراء، والتي بدت لي كعجوز لطيفة، في الستين
وقفت بهوان وعليها مسحة من الجمال الغير لافت للنظر، بعد أن
تساقطت أوراقها النضرة.

كم أنت جميلة يا بلدي الحبيبة، لا أدري لماذا يشكون منك!

تري هل سنستطيع الذهاب إلى المصيف هذا العام؟

تساءلت في نفسي.. فكم أشتاق للسير على الرمال المختلطة بالقمامة

وأقف وأنا أراقب الشاطيء الجميل وأمواجه تحمل لنا زجاجات

المياه الفارغة التي ألقاها الناس فيه وبعض الأكياس والمناديل الورقية.

فتحت موقع الفيسبوك وقلبت فيه، وقرأت مزيجًا من الأخبار

الخفيفة بين فيديو لصحفي فقد نصف وزنه، ورأيت كيف تحلقت عيناه

بالسواد ووهن بعد دخوله السجن لفترة طويلة فليتهم يعتقلون كل من

يزيد وزنه عن السبعين..

وبين لقطات مصور ماهر لإحدى القرى ليرينا طبيعة سكانها

الجميلة والعملية، فقد استغنوا عن كل شيء من أثاث وطعام ويختبئون

في أشياء تشبه الكهوف الرائعة.

■ ■ ممنوع الضحك ■ ■

وخبر من هنا عن زوجة لا تعلم أين زوجها حتى الآن فقد رأته آخر مرة من تسعة أشهر على شاشة التلفاز.. يبدو أن هناك من يعتمد إخفاء أخباره عنها لتشتاق إليه.

وخبر من هناك عن شاب يتسم، وعرفت أنه الآن بإذن الله مشغول بعمره في السماء.

سعدت جدًا بقرب عودة التوقيت الصيفي الرائع!

وسعدت أكثر بفرحة صديقاتي به!

قرأت مقالات واستمتعت ببعض التشبيهات اللفظية، والاستعارات المكنية،

والتصويرية، والتمثيلية، والتنوين والكثير من الإبداعات، وخاصة

في الحوارات السياسية الخلافية، ألفاظ بديعة هنا وهناك..

إبداع..

أتابع بإعجاب الحب المنتشر بين أفراد الشعب، وألاحظ زيادة

■ ممنوع الضحك ■

الوعي، واتساع مساحات التناغم بين التيارات المختلفة.

الواقع مبهج، وأنا متفائلة جداً فنحن نتغير للأفضل، الكل يضحك..

ويضحك، راقبوا الوجوه جيداً أيها السادة.

الكثير من الدعوات تتصاعد يومياً، ومعظمها في السجود.

لكل من يسعدونا وأسعدونا بأفعالهم الرائعة، أرجوكم توقفوا قليلاً

فقد غمرتنا السعادة،

ولتمنعوا هذا النوع من الضحك.



د. حناك لاليس
الم البين

فهرس المحتويات

إهداء	5
مقدمة	7
1. إزاي تبسط مراتك	9
2. أفكار رومانسية	14
3. احترس من المرأة	19
4. عبارات تسمعيها من زوجك	23
5. ألو.. بحبك	27
6. رمضان كريم يا ستات	32
7. رمضان كريم للزّجالة	37
8. عبقرية الستات	42
9. شايفاك	45
10. شايفك	49

■ ممنوع الضحك ■

11. جبر الخواطر 52
12. تعرفي إزاي إن جوزك بيحبك 55
13. حاجات ما تتنسيش 59
14. حصاد الغربة 63
15. الليلة الأخيرة 67
16. الشيخة فيفي 71
17. حوار دسم جدًا (أفكار ملظلة) 75
18. عريس بوسي 81
19. سامح 87
20. الملاطف سعد 92
21. عروسة المولد 98
22. وجع 100
23. أهلاً أهلاً بالزوار 103
24. بنت ناس 109
25. مشية الستات 113

■ ممنوع الضحك ■

26. الشاويش عطية 117
27. غلطة 121
28. نوع نادر جدًا 126
29. نصائح لأم العريس 128
30. لظلوطة المظللة 133
31. لما يجيلك عريس 136
32. ست العرايس 141
33. هؤلاء مروا من هنا 147
34. احترس من المهلبية 158
35. أشياء تعين على غض البصر 162
36. كلام للمكلبطين 168
37. احتفال بريء 172
38. حقك عليه 178
39. تيكيلام تيكلام تيكلام 183
40. الوردة الحمراء 186

■ ■ ممنوع الضحك ■ ■

41. في الركن البعيد الهادي 189
42. المربحية بالفندقوش 194
43. مفاجأة 200
44. خليك في هالك! 204
45. عش الحب 206
46. عريس إلكتروني 210
47. منتهى الحب 215
48. حماتك 219
49. كلام في الحب 226
50. ممنوع الضحك 230
- فهرس المحتويات 237